




樊榭山房集

和16
356
1



金華
集
山房

利
311
1



樊榭山房
全集
惺吾題

明治四年三月廿三日
群錢帽
後可贈

光緒十年甲申
冬十一月校刊

四庫全書提要

樊榭山房集二十卷

國朝厲鶚撰鶚有遼史拾遺已著錄是集因所居取唐皮日休句題曰樊榭山房是以爲名生平博洽羣書尤熟于宋事嘗撰宋詩紀事一百卷南宋院畫錄八卷東城雜記二卷又與同社作南宋雜事詩七卷皆考證詳明足以傳後其詩則吐屬嫺雅有修潔自喜之致絕不染南宋江湖末派雖才力富健尙未能與朱彝尊等抗行而恬吟密咏綽有餘思視

國初西泠十子則翛然遠矣前集詩分甲乙丙丁戊己庚辛八卷附以詞分甲乙二卷爲康熙甲午至乾隆己

新錢文
有响

889

未之作續集亦詩八卷而以北樂府一卷小令一卷附焉則己未至辛未作也

提要

國史文苑傳

厲鶚浙江錢唐人康熙五十九年舉人少貧性孤峭不苟合始學爲詩卽有佳句於書無所不窺所得皆用之於詩故時多異聞軼事內閣學士李紱典浙江試闈中得鶚卷閱其謝表曰此必詩人也亟錄之計偕至京尤以詩見賞於侍郎湯右曾試禮部報罷右曾欲止而授之館比遣迎之則已樸被出都矣十餘年間再上公車乾隆元年浙江總督程元章薦應博學鴻詞科試日誤寫論在詩前又報罷而年老矣值部銓期近復入京行次天津舊友查爲仁留之水西莊觴詠數月不就選而歸卒年六十有一鶚揆奇嗜博館於揚州馬曰瑄小玲

瓏山館數年肆意探討所見宋人集最多而又求之詩話說部山經地志爲宋詩紀事一百卷南宋院畫錄八卷又著遼史拾遺東城雜記湖船錄諸書皆博洽詳贍先世本慈谿徙居錢塘故仍以四明山樊榭名其居所著樊榭山房集二十卷幽新雋妙刻琢研鍊尤工五言取法陶謝及王孟韋柳而別有自得之趣兼長詩餘擅南宋諸家之勝

傳

杭州府志文苑傳

厲鶚字太鴻號樊榭錢塘人康熙庚子舉人少孤貧僦居杭城東園敝屋數椽讀書不輟聲雋一時乾隆丙辰應博學鴻詞科廷試被放南歸奉老親與鄉閭諸老酬倡閒客遊揚州有馬氏藏書最富延至其家遺文祕牒無所不窺故其發爲詩文削膚存液辭必已出以清和爲聲響以恬淡爲神味考據故實之作搜瑣抉隱仍寓正論于敘事中讀者咸歛手懾服數十年大江南北所至多爭設壇坫皆奉爲盟主焉尤工長短句入南宋諸家之勝

上湯侍郎西崖大賞其詩會報罷侍郎遣人致意欲授館焉樊榭襍被潛出京翌日侍郎迎之已去矣自是不復入長安及以詞科薦同人強之始出穆堂閣學欲爲道地又報罷而樊榭亦且老矣乃忽有宦情會選部之期近遂赴之同人皆謂君非有簿書之才何孟浪思一擲樊榭曰吾思以薄祿養母也然樊榭竟至津門興盡而返予諧之曰是不上竿之魚也嗚呼以樊榭爲吏固非所宜而以其清才使其行吟於荒江寂寞之間以死則不可謂非天矣予交樊榭三十年祁門馬嶰谷兄弟延樊榭于館予每數年必過之嶰谷詩社以樊榭爲職志連牀刻燭未嘗不相唱和已而錢塘踵爲詩社予亦

豫焉數年以來二社之人死亡相繼樊榭每與予太息今年予有粵遊槐塘以書告樊榭之病不意其遽不起也嗚呼風雅道散方賴樊榭以主持之今而後江淮之吟事衰矣樊榭姓厲氏諱鶚字太鴻本吾鄉之慈谿縣人今爲錢唐縣人康熙庚子舉人生於某年月日卒於某年月日享年六十有一曾祖某祖某父某娶某氏無子以弟之子爲之後葬於湖上之某峯所著有宋詩紀事一百卷樊榭山房集二十卷已行於世又有遼史拾遺十卷樊榭以求子故累買妾而卒不育最後得一妾頗昵之乃不安其室而去遂以怏怏矢志死是則詞人不聞道之過也且王適不難謾婦翁以博一妻而樊榭

至不能安其妾則其才之短又可歎也嗚呼樊榭屬子
序其宋詩遼史二種忽忽十年息壤在彼而今隕涕而
表其墓悲夫是為銘其詞曰

沖恬如白傅兮尚有不能忘情之吟人情所不能割兮

賢哲固亦難禁祇應尋碧湖之故槩兮與握手以援棊

樊榭茗上之故姬也按茗上故姬指月上康熙辛酉

三月十四日辰時生乾隆甲戌正月初三日戌時沒先

徵君逝世十年

墓碣銘

墓田碑記

錢唐吳錫麒撰

在昔修謫仙之祀剔壤青山薦處士之馨割租近縣此
皆眷懷往詰崇想芳徽瓣香之誠不關孫子私淑之意
詎假淵源而沃衍相資苾芬用告蓋所以明後人之公
好樹先士之清則焉若吾杭樊榭先生忍貧於身蓄富
在學事賅其舊扇南宋之風言飫其清得西湖之味一
時推為祭酒末學仰其津逮始舉孝廉之科旋膺徵辟
之

詔似宜仰邀田秩早受圭腴而乃兩屐苔枯一棺蓬掩
幾至前和之齧竟無後嗣之延今西谿法華山所謂王
家塢者其墓在焉樵歌牧笛之往來馬磨牛醫之襍襲

嘉日存言
一
觴聞柏下祭少墦閒則有顧涑園太守過墟墓而生哀
遇春秋而展祀會同志各致慕思亡何舊雨不來故
人已逝徐穉之雞莫設劉伶之土常乾是非少劃膏腴
俾資牲醴安望馨香無缺俎豆常縣爰有諸賢更謀義
舉遂鳩金於冢旁置祀田若干畝付交蘆菴僧常源收
息以爲納糧供祭之用裘乃成於眾腋縣亦出自同功
由是霜露示期粢盛有備藉免餒而之憾庶慰逝者之
心雖或凌跨太虛翱翔八極豈復戀松楸之美計體魄
之安然而湘纍渺然椒漿莫輟水仙近在鞠薦無愆冀
神靈之式憑振風雅於勿替秋風十畝幸不遠於蘆中
寒食一盂願無忘乎縣上因貞諸石以志厥功敢告後

來永念勿懈

墓田碑記

栗主移奉交蘆庵記

仁和胡敬撰

古賢者沒而祭社設有監祠以奉粢盛以司宗祏魂魄戀此粉榆儼然矧夫笠澤游多朝川圖在碧雲青嶂遺壠非遙白露蒼葭伊人所契者乎徵君樊榭有子承祀無孫紹宗嫠婦靡依小姑相迓棲神何所載主而行偕令威以來歸效浮屠而寄宿分索郎之釀味叨清闕之桐陰憑是壻鄉比乎友殯而乃窗窺朱鳥刻認丁蘭捏佛奇生通靈化去豈真委莽未免傳譎於是名流譜以清詞碩彥廣其新語爲位置馬塍里畔山谷祠旁薦少寒泉皮從高閣縈鼠跡蛛絲而幾徧與牛衣龍具以相參飽嘗牆角之酸風冷照屋梁之明月可慨也已今春

趙雱門刺史與蔡木龕李西齋諸君商以先生墓在西
谿主宜近祔乃擇交蘆庵之塔院諏日遷奉馬中爲先
生其右則先生側室朱氏也同龕彌勒成換骨之神仙
相伴維摩有散花之天女閱春秋而兩祀蔽風雨於三
楹想曩時選石開尊叩舷度曲一筇拄雪雙屐拖雲路
宋輦以苔封山秦亭而翠滴新詩幾許舊夢難尋賸秋
水之彎環對林梅之蕭瑟莫不流連光景彷彿生平從
茲勿務增華以期垂遠守斗酒隻雞之約勝事可常共
倚裳聯襪而來扁舟徑渡相與整齊肴菽拂拭壺觴蘆
中人蘆中人庶其靈爽式憑苾芬來享也夫

栗主記

栗主記

栗主記

軼事

厲先生居東園高大父魚亭公居古驛後相去二里
過從最密讀書務根柢之學每著一書輒訂可否手
稿皆留余家遼史拾遺東城雜記湖船錄先後刊于
振綺堂宋詩紀事南宋雜事詩絕妙好詞箋詩詞集
文集並有刊本惟南宋院畫錄玉臺書史僅見鈔本
四庫全書著錄七種咸豐末板燬兵燹越二十二載
余搜羅古文詩詞舊本與范誠民士麒朱英甫士俊
讐校重雕其游仙詩三卷秋林琴雅詞四卷少年作
也與集中未載之若干首都爲集外詩詞先生康熙
壬申五月初二日口時生乾隆壬申九月十一日辰

時沒葬西溪以從子志黼爲嗣又無子木主遂祔入湖墅黃文節公祠道光戊子世父小米公集邑人移奉近墓之交蘆菴又三十四年毀于浩劫同治庚午滿洲冠九如山重加修葺供奉如昔文人學士每當蘆花盛時隻雞斗酒以薦先生宿草尙存莫不感慨係之生平軼事摺拾諸書錄載于左俾後之尙論者有所資焉光緒十年甲申秋同里後學汪曾唯

杭大宗先生詞科掌錄云厲太鴻爲詩精深華妙截斷衆流鄉前輩湯少宰西厓先生最所激賞自新城長水盛行時海內操奇觚者莫不乞靈於兩家太鴻獨矯之以孤澹用意旣超徵材尤博吾鄉稱詩於宋元之後未

之或過也性耽閒愛靜樂山水一再計偕遂絕意仕進以薦來都試題誤寫論在詩前遂罷歸生平詩逾萬首勇於刪擇樂府爲今海內第一仿計敏夫例爲宋詩紀事百卷揆采極富是科徵士中吾石友三人皆據天下之最太鴻之詩稚威之古文紹衣之攷證穿穴求之近代罕有倫比紹衣丙辰先成進士改庶常例不當試後以散館出外稚威以疾太鴻以違式皆不得在詞館豈非命哉

又道古堂文集厲母何孺人壽序云執友樊榭厲先生自其壯歲卽中乙科兩與計偕不得志卽棄去不復事旣而部檄其名趨就選人買舟一至津門留連三月而

返說者咸謂其樂迂習孺才不可以爲世用以余觀之
是謂不知樊榭者也樊榭少而孤露奉太夫人之教績
學以至於有立夫豈不知圭紱之可以榮親祿入之足
以養老而顧杜門卻軌甘寂寞而就枯槁者誠以仕宦
之難惟縣令爲最其能久居其處者大術有二焉佞顏
卑辭骨節嫺媚佞心佞視希寵而取憐一矣憑藉權勢
擅作威福色厲內荏虐斃獨而畏高明又其一矣樊榭
之才千詩百賦鬱怒道繁長輪遠逝雖極之傾河倒峽
而不見其所止若以其鴻朗高邁之懷骯髒磊落之志
屈而與今之仕宦者相習譬之方枘圓鑿齟齬而不相
入而謂其能呢訾粟斯喔咿嚅嚅以爲閃掄乎而謂其

能逞妖作蠱妄生眉眼以絞訐而摩上手度已不能強
而試之則所以貽太夫人之憂者方大此在庸人且知
其不可而謂樊榭之賢與太夫人之通達大體而顧昧
昧而不之思乎且夫人之求仕者將以爲養也樊榭和
而不隨介而有守使其得位而行其志必且飲冰茹檠
其刻苦當較甚於恆時太夫人習於古訓如所謂卻胡
威之絹封陶侃之鮮聞之已熟其所以砥礪其子者詳
慎而周密又可知也然則脂膏之潤與潔白之養兩者
相較孰得孰失豈待智者而後決哉今年九月朔日爲
太夫人八十年辰同人謀所以爲壽者乞言於余余自
羈貫與樊榭交申登堂之敬常拜太夫人於堂下樊榭

巾幘之契計莫有先於余者則知樊榭之深又孰有過於余者乎用敢綜樊榭出處之大節與太夫人之所以成之者以侑一觴焉因以嘆古人捧檄色喜特以庸人待其親而於道未有聞也樊榭其倜倜乎遠矣
沈文憲別裁集詩話云樊榭徵士學問淹洽尤熟精兩宋典實人無敢難者而詩品清高五言在劉昫虛常建之間今浙西談藝家專以飣餽擗搯爲樊榭流派失樊榭之真矣

汪積山先生尊聞錄云太鴻出居道古翛然意遠詩文之外銳意於詞嘗病倚聲家冶蕩者失之靡豪健者失之肆因約情斂體深秀絲邈興至思集輒自比之孫氏一絃柳家雙璫要以自寫胸抱非求悅衆耳也
吳甌亭先生雲夔齋詩話云厲徵君肆力於詩鏤心役腎句雕字琢吾鄉百年詩人中殆難其匹性雅好遊所至搜別名勝攬葛攀藤裴回吟賞必興盡而後已集中西溪諸什直抒胸臆可當山經一卷讀也

王述庵先生蒲褐山房詩話云徵君性情孤峭義不苟合讀書搜奇愛博鉤新摘異尤熟于宋元以來叢書稗說以孝廉需次縣令將入京道經天津查蓮坡先生留之水西莊觴詠數月同撰周密絕妙好詞箋遂不就選而歸揚州馬秋玉兄弟延爲上客嗣後來往竹西者凡數載馬氏小玲瓏山館多藏舊書善本閒以古器名畫

因得端居探討所撰宋詩紀事遼史拾遺極爲詳洽其
先世家於慈溪故以四明山樊榭爲號所作幽新雋妙
刻琢研鍊五言尤勝大抵取法陶謝及王孟韋柳而別
有自得之趣瑩然而清窅然而邃擷宋詩之精詣而去
其疎蕪時沈文愨公方以漢魏盛唐倡吳下莫能相掩
也予於戊辰歲在長洲趙君飲谷小吳船遇之辱爲忘
年交後徵君過吳必訪余於朱氏蘋花水閣凡三年而
徵君下世矣至其詞直接碧山玉田予已錄入琴畫樓
詩鈔故不具論 樊榭下世葬杭州西溪王家塢因無
子嗣不久化爲榛莽後四十餘年何君春渚琪游西溪
田舍見草堆中樊榭及姬人月上栗主在焉取歸偕同

人送武林門外牙灣黃山谷祠埽灑一室以供之子爲
撰文室花同天女散摩圍詩共老人參句以題其楹月
上姓朱氏名滿孃烏程人

陶篁村先生鳧亭詩話云樊榭寶石山云林氣暖時濛
似雨湖光空處淡如僧此真善於領略西湖也其他如
遊智果寺云竹陰入寺綠無暑荷葉繞門香勝花元日
對雪云無人可造真閑日有雪相娛此老翁山莊卽事
云蔬圃鳥鳴秋境界竹房人語佛家風南湖秋望云橫
塘秋水明菰葉老屋殘陽上鮮花皆佳句也
王茨檐先生靜便齋集南湖花隱記云倚城北障隔舍
喧而卽靜水樹明瑟有敞而堂有折而廡有華散生盤

門藩落而延接于櫺檻是爲樊榭山民南湖花隱宋張
鑑功甫所稱管領風月者功甫以循王諸孫性豪侈務
奇意相勝其第宅不一區卽南湖所占在當日不知幾
百畝樊榭以數椽棲託於後其寂寞爲己甚則樊榭之
歉於功甫者也然樊榭學博而文富所述造泓涵演迤
不下數百卷識者謂其必傳于後無惑功甫稱詩家上
將冰如雪食瑀碎月魄雖見推于誠齋楊氏而遺集鮮
傳則又功甫之所遜于樊榭者也君子之游于世有裁
足之思無贏餘之念况出吾之所有不難抗古人而上
之俛仰吟笑綽有餘裕區區居室奚足較其豐約爲且
夫南湖當功甫之盛閨春把菊天鏡鷗汎月諸勝纍纍

無閒壤一時朱黻長纓賓從之填擁鐘鼙笙絲磬筑之
衍宴魚龍爵馬之殫物窮麗誠無所不足迨其後不數
十年淪宇埋音竝就熏歇今茲所見遠巒雲浮卉木翳
蒼禪棲孟瓶之扣食泠泠水次物不停固與爲豪侈者
之役于物也其終不如寂寞者之適吾素已矣題以花
隱樊榭殆欲佩蘭餐菊以終老于斯夫是爲記
又送杭大宗北行序云吾友厲鶚杭世駿博覽精覈於
學無所不貫所爲文詞高旨深若觀濤重溟莫得畔岸
顧自壯盛僅充秋賦志用不達連屈于春卿世之人合
二君之遇觀其所爲功幾疑學廣聞多匪所以適用蓋
古制不講於茲六十年矣自

聖祖仁皇帝御極之十七年頓絃舉網特闢大科一時
苞純稟精之彥應運磨至揚輝宣烈照灼夙古迨後良
遇弗再決科發策僅循常選末師後進靡所傾風二君
枕經靡書含英發藻獨知而寡諧供已而殫力故學古
之獲二君獨深疾驅方輪人之疑二君滋甚茲
天子嗣暉隆緒側席幽潛興繼舊典浙省郡邑博學鴻
詞薦者前後合六十八人呈試大憲掇什之二三二君以
瑰麗卓越炳乎十八人之列以十一郡之廣旌簡所及
僅止數人得無少隘然上嚴虛授下顯良具拔尤升萃
乃獲二君四海稱雋等競疇曩見少之意其亦可以不
作矣

袁子才先生隨園詩話云馬氏玲瓏山館一時名士如
厲太鴻陳授衣汪玉樞閔蓮峯諸人爭爲詩會分咏一
題哀然成集至今未三十年零落殆盡而商人亦無能
知風雅者蓮峯年八十三歲儂然尙存聞其饑寒垂斃
矣 乾隆初杭州詩酒之會最盛名士枕厲之外則有
朱鹿田樟吳鷗亭城汪抱樸臺金江聲志章張鷺洲湄
施竹田安周穆門京每到西湖隄上倚裳聯襪若屏風
然有明中讓山兩詩僧畱宿古寺詩成傳抄紙價爲貴
四十年來儒釋兩門一齊絕滅竟無繼起者 余最愛
言情之作如桓子野聞歌輒喚奈何厲太鴻送全榭山
赴揚州云生來僧祐偏多病同往林宗又失期兩點船

燈看漸遠暮江惆悵獨歸時 詩人筆太豪健往往短于言情好徵典者病亦相同卽如悼亡詩必纏綿宛轉方稱合作東坡之哭朝雲味同嚼蠟筆能剛而不能柔故也近時杭堇浦太史悼亡妾詩遠不如樊榭先生之哭月上也

黃薌泉先生北隅掌錄云先生東城雜記自序云杭城東曰東園先君子家焉小子生于是居已三十餘年凡五遷未嘗離斯地也序作于雍正六年戊申三月是年四月後有移居詩曰半宅從人典全家冒雨遷末云差喜東城近則猶在東城也乾隆己未有予賃居南湖八年矣其主將鬻他氏復謀棲止詩逆溯之遷居南湖之

歲乃雍正十年壬子是年有南湖初夏詩所謂草堂近卜約齊鄰者也至乾隆庚申始移居麋公古社詩所云麋公祠宇今相竝且逐鄰翁掠社錢者也是先生前後凡七遷皆在東而南湖則近北矣

李旣沔先生鶴徵後錄云樊榭之詩能於漁洋竹垞兩家外獨闢畦徑自成一派其幽深精妙窮極雕鏤譬如入幽崖峭谷幾乎斷絕人迹當時杭堇浦全謝山輩無不推服錢籜石翁有評本亦爲心折今海內言詩者標新領異務脫恆蹊多以樊榭一家爲宗

吳子律先生蓮子居詞話云樊榭生平有煙癖類韓慕廬嘗譜天香詞傳諸好事同時汪韓門翟晴江有詩全

謝山有賦足備菰材故實

世父小米公借閒生詞云樊榭先生木主舊附武林門

外黃文節公祠戊子正月二十一日同人移奉西溪交

蘆庵先生墓故在西溪也譜法曲獻仙音調並用原韻

烟渺南湖草迷東墅欲安吟魂何處先生自南湖移居東城路逐溪迴

寺依雲住騷壇舊日樽俎歎大雅淪亡久輕鷗自來去

漫相顧薦寒泉萬梅花裏天女伴隨手散空飛舞先生姬人朱月

上木主亦定月下徜徉記前游微笑心許窈窕幽棲悅披

尋集內妙句待荒阡澆酒莫又清明時雨

吳仲雲先生杭郡詩續輯小傳云厲志黼字之甫一字

繡周號層雲錢塘諸生為雄飛徵士從子即為徵士後

又為丁鈍丁先生愛婿詩笈文津皆有所受嘗與蘇展

亭許堂柯大巖觀郁陞宣禮倪嘉樹一擎黃書厓模周

亦菴駿發為文字之會分題審韻無集無詩惜多散佚

所居在城東倉巷破屋蕭然糲餐自給竟困於縫掖以

老按雄飛亦先生之字也見杭郡詩輯小傳

阮文達學經室詩錄云蔣蔣邨學博炯請書厲樊榭墓

碑且與里中諸君子共置祭田報官立案歸西溪交蘆

菴管理詩以紀事劉樊窗榭說明州遺蛻西溪土一邱

多分神仙無子在但憑天地有詩留他年碑碣碧苔古

此日墓田香稻秋記取法華山下路詞人長與護松楸

戴文節習苦齋畫絮云余最愛厲樊榭搖搖四詩人漾

入梅花煙十字空澹幽杳得未曾有軟紅十丈中安得
遇此聊假豪楮為壺公之壺

許董生教授重桂堂集云奚虛白疑居湖城南舊為鮑
氏溪樓卽厲樊榭徵君納姬人月上處也虛白摹遺像
屬題次圖中詩韻百年數文獻君名留人口彼姝適所
遭幸于如是柳樂府賽旗亭孰分袒左右俊遊艷稱前
佳話永垂後溪樓亦靈光終古闢戶牖天公選替人圖
書要諸久近釣漁隱漁親酌酒奚酒稱酒奚酒釀酒青山紅
袖閒重置斲輪手光芒交映輝何處蔽沫斗許我補題
詩漫郎成聲叟

俞蔭夫學政春在堂隨筆云厲樊榭徵君墓在西谿法

華山之王家鵑因卽奉栗主於西谿交蘆菴事詳吳穀
人祭酒樊榭徵君墓田碑記道光庚寅戴文節偕徐汪
兩君至菴祀徵君歸而寫為長卷山水縈紆蘿葛幽蔚
樊榭詩所謂一曲溪流一曲煙者盡此尺幅中矣舊藏
章次白廣文梅竹山房亂後失去丁君松生又購得之
因付交蘆菴僧收藏以存名蹟時交蘆菴亦因亂後傾
圮如冠九觀察出資修葺并屬何子貞先生書徵君及
月上姬人栗主仍奉菴中今又得文節此卷名流韻事
後先輝映足為西谿生色矣松生以示余故紀其略焉

軼事

昔唐楊綰為文恥於自白非知己不可得而見而魏丁敬禮嘗求人定其文夫恥於自白者自珍其文者也求定其文者自疑其文者也僕少好篇詠晚頗知難三十年以來所作隨手棄斥存篋中者僅十之二三暇日編次古今體詩為八卷長短句二卷譬之山謠村笛雖無當於鍾呂之響而向來所閱閑居羈旅怡愉憂悴歷歷在目每一開視聊以省憶生平竊亦自珍自疑願與審音者共定之外有雜文若干卷叢綴若干卷將次第排續焉得毋蹈詭符之誚邪乾隆四年三月朔錢唐厲鶚自序

自序
樊榭山房集自序
音香共成之似有餘文者千卷兼錄若干卷其大者其
目目一開題應以首題主平麻衣自舒自跋願與
當休論以之警而向來想開風聲越計愈憂平
六古今謂高風入卷是賦向二錄書之山結林苗
平以來視射胡羊乘孔奇對中昔曾十五二三即日
其文者自發其文者出對心我誠有知歎賦三十
遊賦曾末人衣其文夫佩然自白昔自舒其文者
昔賦賦賦賦賦賦賦賦賦賦賦賦賦賦賦賦賦賦賦賦

樊榭山房集卷第一

錢唐厲劍鶚太鴻

詩甲

金壽門見示所藏唐景龍觀鐘銘拓本以下甲

嗜古金夫子貪若籠百貨墨本爛古色不受寒具宛便
續金石錄明誠不是過鐘銘最後得斑駁豈敢唾照眼
三百字字字蟠螭大撫迹思景雲往事去無邪初翦桑
條葦柘袍受朝賀范鐘崇玉清構炭飛廉佐九乳器未
亡雄詞壓寒餓裝比李仙丹徵句迭倡和虛無奚足稱
懋績於此墮吾思景鐘銘天筆濫傳播

游無門洞



自白
昔者共安之
百目餘一開
當以論曰之
平以未也
其其文善
謝謝曾木
昔者共安之
百目餘一開
當以論曰之
平以未也
其其文善
謝謝曾木
昔者共安之
百目餘一開
當以論曰之
平以未也
其其文善
謝謝曾木

樊榭山房集卷第一

錢唐自厲鸚鵡太鴻

詩甲

金壽門見示所藏唐景龍觀鐘銘拓本以下甲

嗜古金夫子貪若籠百貨墨本爛古色不受寒具宛便
續金石錄明誠不是過鐘銘最後得斑駁豈敢唾照眼
三百字字字蟠螭大撫迹思景雲往事去無邪初剪桑
條韋栝袍受朝賀范鐘崇玉清構炭飛廉佐九乳器未
亡雄詞壓寒餓裝比李仙丹徵句迭倡和虛無奚足稱
懋績於此墮吾思景鐘銘天筆濫傳播

游無門洞



陰竇絕曦景石雨垂癡龍白雲嬾不收繚繞東岳松定
僧涌壁像海眾驚靈蹤藤花拂又落暝聞烟際鐘

擬古二首

我峩崑崙山鬱鬱環剛樹仙人散綠髮正陽無風雨彈
我白雪琴高止哀無女苟得一心人聊以結衷素
美人生南國織手工織紵或為繞梁歌當窗揚清音色
麗奪華燭情絲閑錦衾戒旦上蘭皋亭午眺青林采葛
知心苦激漂能自沈不為懷春意誰識空聞心

花塢二首

法華山西山翠深松篁蒙密自成陰團瓢更在雲深處
惟有樵風引磬音

白練鳥從深竹飛春泉淨綠上人衣分明孟尉投金瀨
吟到日斜猶未歸

牧童詞擬張司業

主人授我烏犍牛為言主人百不憂朝逐水草暮歸宿
不使飛虫傷牛目牽牛且向南陂嬉不知牛腹飽與飢
一朝牛病逃鞭笞主人自能問牛醫

觀汪青渠所藏嵩山諸碑版拓本六首

漢啓母廟石闕銘

開母化為石其事本荒誕何年六六峰石闕字漫漶

東魏嵩陽寺碑

運歸賀六渾悲吟後漢書可憐嵩陽寺巖肩劫灰餘

秦王賜少林寺主教

逆豎德充符一干思驅羊當時殲除力何以資空王

天后夏日游石淙詩

金輪昔垂衣道暑平樂澗仙巖類削成幾人侍游讌

唐裴淮少林寺碑

傳聞三花樹香雨徧諸天何日持茗帚心空初祖禪

唐尉遲汾嵩山靈勝詩

名嶽鎮中畿靈異紛不一欲從劉根游吾其采芝朮

秋夜宿葛嶺涵青精舍二首

笑看圓月上前峰塔影微瀾卧玉龍林際窺人太無夢

好風吹送隔湖鐘

書燈佛火影清涼夜上層樓看海光蕉飈暗廊蟲弔月
無人知是半閒堂

晚秋寄楊楊山

半籬柿葉擁堦除又見臯蘭卽漸疎水減舊痕魚上後

霜傳新信雁來初雲山不用遮方麴燈火惟應照佛書

寫寄寂寥君定會宅南難覓柳郎居

讀水經注寄金壽門

霜橘耀西林木葉滯寒雨流觀桑欽書靜檢道元注峰

瀨奔几案恬目非一翹玉笥若境接香爐定神遇或時

談幽怪細儒訶繆誤不知天地大安識陰陽鑄持問蒼

水使祕簡儻可覩弱齡耽覽涉苦乏濟勝具不如從韓

終服食生毛羽君有禽尚心告我懷所寓

西溪道中

連野看峰秀晴雲忽有無寒田吹糴稔清渚亂鷗鳧意
謂前林近誰知細路迂人家炊過午空翠集山廚

由牛滑嶺至龍門坑

山腰多農家茅茨映山色暝烟歸樵人溪光帶禪客樹
遺鶴毳鮮泉瀉龍猿白愛此欲移居惆悵振輕策

宿龍門山巢雲上人房

山在錢唐之西
俗名小和山

山樓出樹杪夜宿萬山中虎嘯不驚定鐘聲疑在空背
窗棲鳥影滅燭聽松風明日尋塔水應添十二筒

冬日雜詩二首

霜酣榭葉一村明茅屋高低烟火生多事牆頭烏白鳥
夜闌相答紡車聲
水邊僧屋刹竿雙飢鳥窺人上石幢解向西風吟落葉
黃金合鑄賈長江

蠟梅

勻掠宮黃鬢朵鮮斜門疎竹映便娟年年分餉銅街處
正是城南小雪天

月夜自草堂步至永壽寺望東臯餘雪

微月在門前冷然發清興衣袂入風舉屐齒共冰競遂
尋桑竹閒蒼涼得古徑鱗鱗見殘雪遙山瑩而淨陰地
銷還凝老屋凍稍勁卻顧所來路始知原野寬寒鐘遠

更響到寺棲禽定霜闌星芒大天清樹影正決皆無纖
翳觀心極明映悠然林臯意即事寄謠詠

人日游南湖慧雲寺七首以下乙未

南湖春水綠溫暾老柳生稊竹有孫頭白僧閑能引路
斜陽挂處指三門

鐘魚寥落入新年玉照堂空曠水田今日不成煎餅會

張功甫賞心樂事有人日煎餅會粉圍香陣憶詩仙會粉圍香陣憶詩仙張梅詞也

禪房鳴腳脫層陰定破關門芋火深至竟繁華歸夢幻
最無人處叫春禽

蓮莖菱葉卧敲斜水外經寮記鬪茶劫火南朝四百寺
一袈裟地屬張家

捨宅裴休事亦勤披緇王且謗須分酒熙年往碑陰在
細讀龍華發願文

寺碑史浩撰樓鑰書碑陰功甫自作捨宅發願疏最工首二句即隱括其語

朱崖南去烏呼風草木平泉笑衛公何似試香城北暨
殘僧禮拜冷烟中

登高何處可忘歸古寺梅風動客衣漸有放生團社約
魚苗如蟻水初肥

過丁茜園齋觀陳洪綬合樂圖

春陰泥殺人如醉不得醒東風勒花房未破小桃杏
來過蕭齋款語樂閑靜先生澹蕩姿愛客具佳茗
那用嘲水厄頗足勝酪酏自起展襟池射日驚秀穎
一女鞞兩鬟輕紅掩斜領摻手擊長笛將吹絳脣冷
一女臉如

蓮黛色自脩整襪襦飄回風輕容曳烟影半扶琵琶肩
指撥試俄頃復有兩女奴鴉鬟遮瘦頸腰身十三四背
面若相請或是梁綠珠生自雙角井弟子得宋禕吹笛
入清迴或是楊阿環合樂最機警鳳紋邏迤槽只有阿
蠻省先生木石腸伐性久已憬翻然持此幅儻足娛老
境列屋閉蛾眉便娟笑齊瘦無須五斛螺簾衣兼可屏

沙河

澄明日影射魚罩淡冶風光上鴨陂齊浸籬根三尺水
小桃正是試花時

寄倪子珍讀書仁王寺

聞君高卧洛生咏遙望吳山病目揩居士舊傳十笏地

幽人新學八關齋野雲帶雨飛入戶林鳥聞鐘時下塔
更憶清吟獨繞寺撚髭不覺落松釵

北郭

北郭夕陽外人家住水西藤花當戶落荷葉並橋齊沙
碧鳥雙下樹涼蟬獨嘶輕絺來往熟幽興坐堪攜

早秋夜坐懷蔣丈靜山

夜軒殺明燈秋蟲啼四壁人靜月復清雲疎雨猶滴懷
君竹閒徑況此風中笛幽意其如何堦草自寂歷

絡緯

絡緯亦應候身潛葉底敲刁騷風激響斷續雨兼悲破
屋燈青色柴門夜黑時哀聲感寒女能得幾絢絲

送梅耦長先生罷泰順令還宛陵

歸去宣州七月初蕭然行李意何如官身已謝潘懷縣
真散應同陶隱居稍待西風看雪稻更聞春網薦琴魚
修船謠似春陵作此日雲山不負渠

先生在東國時作修船謠恤民役也

題畫松鼠

閑拏五粒戲睽日烟霄外不須歎倉中久已誤上蔡

汪青渠送研光牋

蕭然注毗曇長物亦何有夜吟蹋壁卧朝吟但袖手故
人造雲藍輒遣五十枚瑩然女兒膚心目為之開一笑
磨烏丸欲試復惆悵剡藤遭天闕此語定非妄既無連
繇書亦無播拈詞時展白萍文報君長相思

月夜懷金繪占游湖南三首

徘徊去燭房延佇啓虛牖白露淒未零眾星惟見斗清
輝在衣裳憶昔同攜手無由折瓊枝紆軫一搔首
搔首那可期遠在沅湘麋青楓泊船處竹外湘娥悲聞
歌兩東門秋髮飄如絲隱隱女嬃砧千里長相思
相思共明月復此清商節迢迢蒼梧雲芳草殊未歇羈
人常念歸誰能忘離別驚蜩過樹飛斜漢亦已沒

九月三日池上

片段殘雲都卷盡水邊秋思渺無涯西風吹過徐熙鴨
丁倒蓮房搖箭戟

湖上擬游龍井不果寄汪大輿

平生湖山鄰幽夢阻龍井辨才跣跡處結思令人瘦畢
景來北山清樾鳴禽冷下見澄波生鱗甲蹙百頭窈窕
前林烟相戛兩峰影樵徑橫翠微莫辨風篁嶺遙知清
冷淵梵放相與永何時同君游佳處得細領

西溪月夜懷大滌山二首

天柱峰頭見晴雪瑤壇玉洞暗相連石林夙具看山癖
也負知宮三十年某石林提舉洞霄宮嘗曰吾知宮三
十年未暇一至孰謂吾為愛山者乎
雲根際夕抱冬心溪曲沿緣不可尋遙想郭文樓隱處
夜泉孤月萬松深

金繪占自湖南游桂林歸賦贈

西南山水敵清都天與詩人縱目殊郡有顏公稱二始

溪經元子署三吾鉤藤酒美能攜否桂布衣輕得浣無
笑我平生寡游歷相逢子細問媿隅

讀五代史二首

五季方龍戰濁亂失昏曉士有苟祿者傾身以營飽遐
哉鄭先生冥心棲靈顙松脂去三尸獨立塵壒表
吾愛張監軍心為巨唐有不知鬪雞兒自取竟相負刑
餘誠何傷報韓同不朽區區六臣輩晝日但顏厚

江上訪金壽門出觀顏魯公麻姑山仙壇記米

海岳顏魯公祠堂碑拓本

雲沙繞村南小築如鹿柴去聲掃地焚香人相見一瀟灑
論書近攜拾勿事徵倒薤側聞麻姑壇名蹟興先邁餘

髮時垂腰丹砂亦狡獪有無海揚塵故地今神界堂堂
 小顏公頗喜究奇怪波瀾縮道麗接待記仙話陶八碧
 霞丹入嚙若沈湮汝州死大節竟等蛇蟬解頭人述其
 事穹碑字如蠶緬彼天寶季豔煽金鏡壞二十四郡中
 義士抱耿介獨抗阿攀山聲振哥舒敗晚令使賊庭讒
 口足類齟卽云歸羅浮乘風固可快靈均爲水仙理有
 說非註持此語故人相顧發長喟落落青瑤鐫當見百
 靈拜坐深地爐灰浩歌共決背

同南畹二兄游河渚飲沈晴川書齋以下丙

到來知不易遠近引漁謳野水中開閣交蘆外倚舟峰
 陰含古色梅凍得清愁漫比平原酌高人肯見畱

寶蓮山是韓平原故宅

霧閣雲窗付渺茫平原事往徑全荒居人不識太師竹
 風葉幾枝搖夕陽

題沈其章秋林積雨圖

黯黯秋郊陰淋漓愁霖晦作此雨點皴濃如五斛黛堆
 阜互起伏徑術迷向背目窮中林深卻滴梧葉大數間
 尖頭屋溼雲垂霏霽潤疑生青苔漏欲添白蓋勿謂炊
 烟遲此中有人在

觀吳耕民所藏唐泰山摩崖碑拓本同繪自作
 羨君少年癖好古曾臨日觀登天門穹崖彩翠忽明滅
 雞號下見扶桑暎開元天子勒銘在苔滑不憚兩手捫

爲尋墨本完好寡過客求索民胥冤梯空緣壑歷至險
實惜鉅費哀驚魂野火燒裂風雨碎連紙珍似收瓊璠
兼金購此得舊拓坐客竦視息眾喧八分飛動六百字
鸞飄鳳泊神明存當年東封有本末燕公爲相開其原
誰與異議獨乾曜廟堂那念供頓煩惟侈海宇已殷富
思以大典誇黎元金泥石碱事非古萬乘帳殿勞雲屯
天章震耀復嚴謚御墨揮灑如飛鷲未聞虞舜昔封禪
大書深刻畱巖根况兼本命禮西嶽金天位號何雄尊
述聖頌得呂補闕豐碑離立蛟龍蹲岱宗事盛過太華
遺制遠與乾封論須臾時易天寶兩京頽洞風塵昏
青騾蜀道播遷日百神不效前驅奔乃知用事賭符瑞

史公載筆皆微言北里之禾鄙上黍秦漢故轍徒紛繁
卽如此碑亦炯鑒延秋門外哀王孫濡紙脫文一感槩
排翮思作摩霄鷗

感秋

炎景忽已往素節來有期西池日夕涼風雨飄無時高
樹易爲響離蟬如自悲誰能慰縣思非無酒盈卮

秋日同王菊存汪青渠楊開緒渡湖至壑菴由
幽居洞上看摩崖家人卦登慧日精舍訪亦諳
上人際晚下山尋明昌化伯墓不得汎舟而還
得詩四首

延緣截鏡面一湖殊陰晴西南三五峰雲氣縷縷生孤

權卽前浦翹鷺涼不驚朱蕘林表燦綠樹崇岡纓遙聞
微鐘響旁見孤塔明南屏忽覲面蒼翠紛相迎水天寂
於夜到岸菰蒲聲

注目望山坳靜侶若孤往隱見草閒泉時有脩蛇想清
風散木魚佛屋藏篠篴度橋潭鏡皎入洞岳楹敞窳窳
中復穿微徑折屐上快觀凍水碑義取風火象摩崖擅
八分遺跡成俯仰秋氣松際來吹作居巢響

絕頂露扶闌懸崖度禪榻爲訪贊公來不憚芒履踏入
室愴忘言風樹自相答四角鈴鐸鳴眾綠何獵颯俯見
北峰雲奄與南峰合雨脚渡湖至驚起兩棲鴿一氣中
迷濛天鏡互開闔稍霽烟鬟靚日射黃妃塔了然清淨

界幻象無不納同游五六人看雪期深臘

取徑下仄磴秋草自作花山風襲人衣叫噪白項鴉飽
聞外戚墓厚葬崇驕奢當時議禮者恩先丁傅家吁嗟
百年後變化如蟲沙大儒椎控頤金棗出隧斜欲往弔
興亡覓路迷三叉暝色起前林喚渡牒子孥晚湖波皴
鱗眾岫興陰霞歸時想清景漏鼓忘頻撾

池上

高柳初髡倚晚汀幾時來此補魚經昨宵知有稀疎雨
滴破一方青白萍

佛屋閑題

梵夾意蕭然安居不離禪人依淨綠水地輒妬羅縣已

菊將梅候初霜欲雪天何妨臂鷹手自送佛前錢

白香山水月觀

音讚云淨綠水上虛白光中地
觸柔輾似妬羅縣見法苑珠林

九里松至西山道中同金壽門周少穆王雪子

作

不負幽尋出郭門木繇裘暖趁朝曦山遮壞塔可十里
樹裊孤烟自一村高冢多風松落子空田無雪稻生孫
須知歲晏人游少正要諸公細討論

過宋通問副使朱公少章墓

突兀殘碑立古阡行人猶記紹興年青衣已見君王辱
白髮何期使節旋老淚冰天他日恨遺聞曲洧至今傳
一杯築並花宮地夕唄晨鐘更惘然

冷泉亭

眾壑孤亭合泉聲出翠微靜聞兼遠梵獨立悟清暉木
落殘僧定山寒歸鳥稀遲遲松外月為我照田衣

靈隱寺月夜

夜寒香界白澗曲寺門通月在眾峰頂泉流亂葉中一
燈羣動息孤磬四天空歸路畏逢虎況聞巖下風
曉登韜光絕頂

入山已三日登頓遂真賞霜磴滑難踐陽崖曦乍晃穿
漏深竹光冷翠引孤往冥揆滅眾聞百泉同一響蔽谷
境盡幽躋顛矚始爽小閣俯江湖目極但莽蒼坐深香
出院青靄落池上永懷白侍郎願言脫塵鞅

蓮居

宛似游墟落疎籬曲繞門僧房倚樹腹梵板響城根犬
吠驚風葉鴉歸識水村流傳李先輩瘞硬小碑存

中有李長蘅書

碑絕佳

西溪汎舟遇雪

以下丁酉

孤櫂不覺遠窈然流水深春烟沈大嶺密雪響疎林白
社何年約青蓑舊隱心推篷起寒色雙屐阻幽尋

題陳子健所藏宋人畫太真按舞圖

柳芽將吐菜甲新西堂小雨愁青春有來此畫傳院體
調鉛寫黛知何人三郎深宮常晏起獨愛霓裳譜風水
太真能舞作舞詩羅裊動香香不已念奴按拍寂不喧

罷敕雜樂呼梨園至今看畫尙有恨鞞塵未歇烟塵昏
良工好手誠難遇周昉張萱具生趣勸君裝潢藏弄牢
他時好待添丁付

西溪歸訪王既成

牆東君公清且賢畱客纜我西溪船霍山廟前看殘雪
溜水橋下添新泉梅開香破缸面酒日出暖射牀頭氈
春濃更當挈伴過菜花繡徧村村田

三月十三日游法華山

連山背湖西地脉聚而凝婆畱霸氣餘峰嶺尙雄勝嘉
我同游人穿榛得荒徑陽坡鼈帚披陰崖龍腹巨天風
鼓蓬勃白雲若沸甌置身萬松顛心曠肅觀聽紆回下

前阪翠樾出僧磬入籬泉偶枯方井鑿亦滢繡田盡雜
花烟中笑羣媵茶戶競物利衣短不掩脛采摘泣晨露
山謠頗相應酌酒墟墓間作達榼隨罄芻狗本幻誕石
馬久光瑩神絃走村氓縹緲事愚佞洞簫裊林木篝火
繞巖磴因之日夕還嵐彩眩難定此境天所遺庶以忘
躋蹬望中青帘曳猶似攜餘興

北郭紀游四首

散花灘

當年張外史此地有行窩喬木居人少蒼烟廢圃多道
心遺外物身事託樵歌最好灘前水春來似熨羅

江漲橋

長虹偃郭外勝日記偷游簾卷橋南樹花飛水上樓客
行津鼓動天遠峭帆收俯仰悲人代茫茫對碧流

妙行寺

棟宇何年締規模壓一城烟霄騫鐵鳳風雨吼華鯨臨
水春船集巡廊午日明喻彌陀畫佛不見斷碑橫余嘗見

錫容杭日記云出北關門妙行寺中有碑石數本云喻彌陀神
筆所畫佛像次禮古觀音像相傳唐朝塑者今則俱無之矣

西馬塍

行徧馬塍曲春風無處無酒堪澆白石墓已沒黃墟接
樹看鄰媪傳芭走里巫移栽入朱戶舊事續潛夫宋姜堯

馬塍蘇石挽之云幸是小紅方嫁了不然啼損馬塍
花小紅范石湖所贈青衣也見陸友仁硯北雜志

晚步

斜景忽已暝流鶯時一鳴水光知月出花落見風行僻地非遺世新畦欲耦耕孤吟少儔侶發興自江城

園居和蔣丈靜山

市塵拋後稱閑居好結南隣分有餘迳徑相過惟礙竹小畦旋往欲刪蔬不離板閣池光動自下蘆簾暑氣疏寄語輪蹄馳逐客清名持較定何如

秋分日呈陳楞山兼寄亦諳上人

拉瑟西風故故催江鴻社燕共裴回那知極浦水花老又接繞籬岳桂開隔歲相思同濁酒幾旬塵土挽純灰瘦權更在高寒頂清露翻經坐石臺

題水居消暑圖

峭壁插天下無地萬荷喧雨境翛然適來披畫當秋爽尚想風亭散髮眠

友人貽頻婆果賦謝十韻

是物幽燕貴雕盤獨薦時芳華存楚夾蔽芾補風詩

史曰下舊開云疑卽甘棠楚楫名空得唐梯摘易爲乍隨籠壓騎還想雨

低枝澹白腮輕柰勻紅頰肖梨靈根吳客少俊味細娘

知齒冰臨叩渴香迷下蔡疑枕函聞逆鼻

瑤席鯢支頤墜地誰工寫

春夢裏好好寄相思

雨夜述懷十三韻

癡雲催暝早坐覺瀉幽涼院靜無來雁天陰絕吠龙薄

寒初浙浙孤燭自幢幢觸迂愁難斷短音崢嶸意未降畏
途同歷阪殘歲類奔瀧入世憎高髻澆習漫滿缸前塵
青豆舍舊夢碧油窗曲踊何煩百吹箎信少雙浮沈仍
蠹簡浩蕩想漁艘虛冒棲遲好須安里俗唵朋歡違尺
素詩敵束空杠倦枕敲還醒清鐘遠更撞幾時深卜築
繞戶種雞腔

無盡意齋寒夜用覺範送元老住清脩韻

竹雪欠清聲餅筮有餘韻西齋擁爐坐燈火耿幽映微
緒獨繭繅長謠適真性朱門貂襜褕夜游付一哂生年
號迂疎厲歸真自號
錦溪迂疎子窘步遠捷徑寒林聽脫葉濩落固不愠
何妨戒香熏詩格與僧近聊以文字禪解此塵土恨折

齋黃梅花是名意無盡

歲暮答王既成

北郭幽棲一水涯松毛蓋屋薛侵堦詩來慰我不稱意
歲晏憐君獨寡諧臘鼓無端喧委巷春燈取次翦閑街
疎梅半樹展書卷賸欲此中尋好懷

春寒以下戊

初月已既魚上冰峭寒陡作相憑陵濃陰黦黦天地凝
欲見白日何時升紅舒翠坼力未勝有如志士坎壈仍
空齋枯坐粥飯僧噤瘁誰送半臂綾夜聽街鼓睡不能
紙窗升降風中燈侵晨更覺被有稜所遭偶爾吾何憎
只思布韞游馬腔花氣一片丹霞蒸

春日逢施謂伊話舊

十年墜雨惜相違，朋輩如君儂指稀。
雞肋只今殊少味，虎頭何用盡能飛。
秋湖憶共青油舫，晚寺曾尋白竹扉。
回首昔游都在眼，杏花風外一霑衣。

二月二十七日阜亭山下看桃花二首

登船出郭卽通津，不負佳游及此辰。
駘蕩年光挑菜渚，支離身事看花人。
戲鵝語鴨漁莊靜，烟暖天清水寺春。
當境底須頻恹酒，銑溪如許已成塵。

阜亭山下集游船，半載尊罍半管絃。
並岸斜看花影倒，落英亂點水文圓。
東風不信將三月，往事無多又四年。
只有吳娘知可惜，折枝繡滿禿襟前。

首夏雨中卽事

不斷迎梅雨，散絲水村誰與共。
心期晝眠有味低，回久殘客無情報。
謁遲乍暖乍寒開，苦棟澹紅澹白到戎葵。
平生閑卻籠鷹手，自試隄麋寫小詩。

病目戲成

微疾何來解相惱，焚香掃地一閑身。
且輸名士誇巖電，欲共高僧究眼塵。
細字難拋工作祟，好花飽看已過春。
阜羅爲障非吾事，養就疎慵學避人。

月夜舟出北關同壽門作

出門輕百里，猶喜共君行。
雅愛聞吳語，誰能計水程。
野橋迎月直，斷岸見烟生。
涼蛤爾何意，喧眠到五更。

菱湖

到眼忽成市千家匳鑑開魚多論斗賣菱好及時栽歷
歷帆斜過沄沄水倒回有人葭莢外銅笛或吹來

碧浪湖

白塔紅亭宿霧收放船港口足銷憂蘆分山色離披去
水接雲容淡沲浮風物三吳何處最陂塘五月已如秋
樊川可是詩情減不為探春也合游

同壽門訪長興鮑西岡明府畱宿縣齋卽事

聞道吳西俗最佳扁舟聊復散幽懷詩人來作長城宰
客子如停小謝齋落魄自憐仍楚製荒唐多分續齊諧
梁吳均邑人著續齊諧記凌晨忽起游仙興震澤包山詎有涯

督牛犁我出歐陽圭齋句也壽門爲圖因題其
後

高人思食力所寄在扶犁自足一生事何知四體疲烏
犍行水淺白鷺下田遲緩緩逢鄰叟香秔問可宜

同壽門游若溪廣惠寺是陳武帝故宅

寺中有井相傳帝初生時

取水以浴忽涌起數尺明歸熙甫作今時刻銘其上

若溪走玉龍連山抱千層水風引到寺老樹青鬚鬢上
巢大觜烏下絡交枝藤王氣久死灰陰怪爭來憑陳帝
起里中樵牧猶相矜擣青一旅奮驅賊如秋蠅悲哉蕭
老公不得顧眇僧跛奴亦何爲大命歸吳興此地卽豐
沛精爽依禪燈長爪攜淑儷雉山望雲蒸我來漱井眉

銘辭義峻嶒傳是洗兒日寒溜湯泉騰更著辱井戒不
覺欲歔增可憐馬上郎義憤尤足稱成敗有天定隙為
英雄乘煌煌江左業從此期恢弘身後那可料暴骨攄
讐磨古愁起暮色閑話同詩朋循廊土花碧鈴語搖觚
棱

蘋洲曲十首和鮑明府

日落采蘋去江南春色明不因洞庭客那識是閨情

明書解柳惲江南曲云是樂府閨情之遺

曉過嬰蘭堂逢見嬰蘭婦為采黃藤桑方出摻素手

景集云吳越備史錢鏐有嬰蘭堂詩古樂府桑桑感陽風阿那嬰蘭婦唐人采此為名耳談鑰吳興志鄉土有黃藤桑

郎羨合羅絲水凍色更鮮儂羨同功繭一生作纏絲

董斯張吹謝壁湖西

吳枝乘湖蠶最上者日合羅絲縣以兩蠶共作繭者號同功繭

新梳茴香髻試約春游伴莫上樓賢山怕人呼作管

云吳興里語呼誰為管管夫人樓賢山人見松雪誌項阜謨筆記云吳中有韋娘髻後更謔為茴香髻也

網得車溪魚歸來搖短楫為郎持作鱠最愛對翻蝶

興記車溪出美魚明若上視翁家藏唐人斫鱸書一編有舞梨花柳葉纓對翻蝶蝶等名

行經蒲帆塘塘水碧洄洄想當初開日的是見歡來

程縣北二里有蒲帆塘刺史楊漢公開而得蒲帆因名周密齊東野語唐樂府云蒲帆猶未織爭得一歡成舟子呼造帆曰歡

朝乘采菱艇蕩漾出湖跌羅裙十二摺摺摺似青蒲

深居若溪有稿簡贊筆云羅裙十二摺吳中下里之曲也談鑰志湖跌菱色紅而大

豹腳猛于鷹輕綃圍夜玉安得邀歡來江子匯邊宿

豹腳者尤毒東坡詩風定軒窗飛豹腳是也惟江子匯無之

梅子雨初過儂家水浸扉淋灰應有禁不出浣春衣

張稚通

紀湖俗夏至日斷梅立時半月內禁淋灰浣衣

雪溪水四合飛英塔兩重住近墜釵橋早晚郎相逢

太平寰宇

記雪溪在烏程縣東南二里凡四水合為一溪李謝戒菴漫筆湖州飛英寺塔中空復有一小塔甚奇巧墜釵橋見勞鉞湖州府志

吳興歸舟作

風俗家多具畫船苕山浮碧在門前自牽賤事急急去
不為蘋花住一年

七夕宿澗西微上人房

入寺松櫟深幽涼蘇暑病崖上飛雨收林中微月映窗
燈翦復翳經聲出蘿徑空山落秋河無人同眺聽

秋夜雨中集汪抱樸齋

愛君池上好不厭夜來頻微雨宜幽鳥初涼健酒人蕭
蕭添白袷點點到青蘋共有悲秋意商歌激四鄰

雨

翼翼中宵雨聲繁遂達晨長風吹不已幽草洗俱新閉
戶耽幽思褰帷起病身惟添上池水煮藥更應神

八月十五夜對酒作歌

院宇霽夕氣圓鏡初徘徊紛紛流汞瀉青桂顚顚白露
凝蒼苔既佳光景惜芳夜何用絲竹鳴相催眼前無二
豪即時有一杯天上愁浪寄地下憂空埋倚門抗麟亦
徒爾置身或在才不才淋浪劇飲自起舞寒輝滉漾侵
衣來妖墓決吻吾且待仍看向曉無纖埃

是夜月食

秋園

瓠架初除搖落時人閒秋士漫生悲
牆東小隱寧非計
竈北清狂枉自奇
露白稻香聞吉語
天青蜚咽動幽思
朝來郭外山容爽
為報閑居取次知

懶

穴居水游不可測
鵝鵝何事濡其翼
祭魚黠冒知禮名
祭罷春江覓魚食
捕時爾莫訴煩冤
畫板為緇銜主恩
丹砂不惜和取髓
好補吳姬如意痕

三徑草堂晚柱

陽春桃李花綴枝
趁妍暖偃蹇青桂叢
花中亦中散
隨時有不堪
養生遂成嬾
結根幽人屋
枳櫬俗喧斷
高秋

月餘閨疎香吹始滿
分無樂天曲
新調按銀管
聊學晦堂禪
微言對偏袒
寄語主林神
知希我自罕

隨意

隨意三條徑
斜通十畝塘
閑非行散得
樂豈注書妨
水碧全涵日
林紅半帶霜
何須鄙夫有
寓口一相羊

夜雨薄寒

閣迴窗虛最寂寥
卧聽撼撼葉辭條
寒初驟入蟲蟬薄
雨滯旋看蠟照銷
一石飲餘聊善諱
四愁情在自長謠
若為學得頭陀法
忘盡前心坐徹宵

白香山夜雨詩不學頭陀法前心安可忘

初寒

塵務經人心思如智井
涸雙轂轉不停
淒颯陡然作古

人期立名噉盡畏獠貉千秋萬歲後遺跡付寂寞何當
攜酒瓢東郊看黃落直追斜川游不羨爽鳩樂

城西讀書雜興二首

烏几麤牀位置便此身暫寄亦隨緣且疎應對如高坐
未有神仙學稚川世路淹回魚上竹歲華飄忽鳥驚絃
時時夢到曾游處溪畔茗花壓釣船

蕭然無客似離羣都護邊書忽遣聞計日止戈應送喜
何人磨盾欲從軍湖通舊引穿溝水城隔猶屯過嶺雲
誰向壽安坊裏問廬陵風調有遺文

壽安坊一名花市
元張光弼故居

於潛王柘村明府招飲寓齋

古屋通津外官閑客復來危檣依水立疎樹向門開坐

少於潛絹香餘下若杯明年天目約飽看白雲回

曉至湖上

出郭曉色微臨水人意靜水上寒霧生彌漫與天永折
葦動有聲遙山淡無影稍見初日開三兩列舫艫安能
學野鳧汎汎逐清景

十二月十二日大雪用東坡聚星堂雪韻

寒空似墨吹雲葉今年真見頭番雪魚羔醜酒任豪奢
擁褐攤書助清絕渚田飢雁跡欲迷深霧跋烏足愁折
積盈暗隙曙光早灑急初更眾聲滅風饕旋作怒虎吼
臘殘已似脩蛇掣細填佛剎妙莊嚴靜檢詩材棄華纈
會參老宿問當機

中峯雪詩誰解
當機作水看

安得清言紛鋸屑有人鈴

馱犯凌兢輸我蘆簾看飄瞥一篇語奇萬口傳東坡詩序云于艱難中特

出寄麗明年餅大千村說江干往事更回首帆飽長淮思老

鐵往與楊山雪中游江干今楊山客淮故及

次韻酬石貞石雪後過訪

安得孤清一破除近來交舊頗彫疎竹窗正在聞風處
雪徑惟君著屐初僕射樂猶輸飲酒諸生業轉困傭書
江干想見寒林好亦欲時時過隱居

於潛王明府寄白朮

市中何處覓靈蹤滿把雲腴手自封藥重一丸慙魏帝
蓂誇五葉謝神農塵區有藉能蠲疾福地於今可鍊容
為向小窗抄序罷幾時飛鳥得相從皮日休詩白月半窗抄朮序朮序紫微王夫人作也

臘月二十四日風霰交作

塗竈傳茲日東京俗尚存祭猶名老婦靈欲乞嬌孫微
霰侵敲枕淒風助閉門久耽蕭寂味寧與子方論

樊榭山房集卷一

四日風霜交

樊榭山房集卷第二

錢唐 厲 鶚 太鴻

詩乙

雨中耕民寄新詩兼貺丸藥奉答二首

以下已亥

抱病卧旬日春物遂已深流光惜晚晚天色空沈沈密
雨泣苔徑輕雲冒花林花飛愴世慮苔積娛冲襟開緘
有佳約霽景猶可尋
若士思遠游達人謝拘束身如腰鼓顙四塵自奔觸豈
無上藥草病求恒不足惠而思好我更徵桐君錄顧我
寡禪益拜命亦良辱

三月十五日晚泊東新關

解纜細雨吹烟昏叢蘆高柳搖空村晚泊沙汀見燈火
田家笑語生春温我生汎梗遽如許難得扁舟同舊侶
休憎一夜風打頭明發青山堪與語

虎阜卽事

塔迴廊迴燕燕飛送春人去戀斜暉似嫌犖确侵羅韞
卻要殘紅作地衣

同青渠抱樸游惠山

梁栢日出宿雨捐主人急喚沿溪船清尊在船興已發
剡剡麥秀翻平田游人愛游較我早爭入柳港吹香縣
名園在眼昔夢到紅橋翠棧相鉤連九龍山色滿屋上
妙有流水巖根穿琤瑤下赴照軒檻木陰霽鬱堪暑眠

尋源且復入古寺泉頭小閣浮茶烟百甌汲貯轉甘冷

遠道拆洗煩烹煎

拆洗惠山泉見清波雜誌

南泠廬阜味奚似屈居第二

吾猶憐平生飲水具真癖烟包雨笠同枯禪干羨萬羨
竟陵子頓爽塵吻甯無緣道人鶻眼照泉碧松聲爲拂
膝上絃罷琴落日我徑去塔影送客東峯巔

題對山開卷樓壁

僧樓恰對惠峯開寒玉泠泠步履回待與山靈話疇昔
杜鵑紅處我曾來

游蕃釐觀

淮甸何年祀媪神雲階月地鎖青春隔江遠見山凝黛
斜日初來雨洗塵髣髴韋郎情是幻淒涼花史怨如新

無雙亭下青苔色，閱盡閑游多少人。

同程友聲紅橋夜汎

月黑水深荷葉路，涼螢無數繞船飛。與君今夜紅橋酒，不負揚州白苧衣。

登平山堂

落日堪銷暑，疎蟬喚客游。析醒嘗蜀井，過眼歎迷樓。天淨山容出，堂空樹影浮。昔賢遺勝地，撫檻小遲留。

初秋寫懷

風雨軒窗枕手吟，乍涼曉覺滿西林。年光又共草色變，秋思有如雲影深。坐對畫叉添寂寂，閑尋茗盃試森森。第三橋畔蓴香滑，欲動歸橈一夕心。

題陳楞山秋林讀書圖

橋隱迴溪樹，隱櫺人間有此小林。垌西風日日翻書葉，吹得數峯如許青。

西溪福清竹院

溪行興不已，竹中得安居。斜日入深碧，冷然風更疎。牀下解脫履，几上乾竺書。山僧不出戶，情滅心晏如。

十一月一日自西溪汎舟之餘杭

性拙見山喜，匹如故疾失。餘杭有勝踐，梭艇冒淒颼。疎林翼霜岸，破屋列烟術。搖兀溪光中，煜煜上初日。平野皆令姿，疎澹狀非一。況逢載穫後，田水涸已畢。曠望愜所宜，漸進叢篠密。喧雀迎舟前，幽討自擁膝。稍稍居人

稠佛剎林外出西峯若有期消搖聊短述

南湖晚望

清絕茗南境晚來歸鳥翻草枯羣漱出烟起亂峯昏僻
邑無驅馬閑農早閉門叢祠望燈影神力至今存

湖捍水有功湖
旁廟祀甚盛

游洞霄宮

大滌元蓋洞天夙所慕時時飛夢凌孱顏茲辰奮足遂
躋討芒屨豈憚山行艱初從南湖歷四井霜清日出羣
峯靜紆回路轉金綫潭鑑匱不動澄嵐影偶逢擇子爲
指迷深入欖林竦壁得異境青山九鎖勢更殊千尋拔
地秀不孤松栝溼翠交撐扶石橋流水聲可娛道旁確

響雲母粉巖隙乳滴羊須珠傳聞舊有無骨箬可等羅
浮古蹟竹葉符帝畱瓊館此奧區圓殿高峙凝塵無其
餘廊廡雖湮蕪蒼篔簹萬个爲笙竽寒風噫竅洗毛骨白
雲上下如飛鳧我思郭文舉無情木石相爾汝何時月
底騎虎歸冷澗上聞仙語我思鄧牧心黃冠遺世來
烟岑幽泉滌硯作山志俗士未許窺清襟自從獯郎作
相年祠官往例縻諸賢提舉惟有李忠定栗主塑像永
永無祧遷尙餘御筆觀虎卧洞天福地額
宋理宗御書寂歷閑階少人過
眞茶啜比換骨膏半日盤旋雜行坐天柱峯大滌洞瑤
房玉宇恍如夢太息天寒日短不得游畱與他時策杖
尋清秋

喜雪

試雪連朝雪已成
彎跽板閣冷光生
斜飛堦面偏多態
白膠池心大有情
炙硯可無今日興
打窗仍作去年聲
水仙已夢黃梅破
共領人間第一清

雪晴

積雪色固佳
消雪無畱痕
南榮聞餘滴
東曦暖微溫
既霽風漸柔
淺綠含陳根
茗穎行有時
靜念造物恩
余拙謝百事
抱影寄空村
淨名經卷在
昔誦尚默存
婆娑一室閒
妙香領無言

次韻答繪甫春日見訪不值以下庚子

東郭半春色
能來破蘚痕
隔林機躡響
比舍井泥渾
行

藥非過市看花乏
應門棲遲如可託
重寫顧荒園

原作

錢唐金志章繪甫

雨後春泥輒行吟
認屐痕菜畦迷遠近
池水漲清渾
看竹過隣舍
聞鐘憩寺門
詩人不可見
惆悵出東園

四月十日湖上作

愛來湖上作浮家
艇子衝波一道斜
日晚水仙祠下去
青山影裏采蘋花

九月五日南山紀游三首

石屋

秋晴風滿山
破寺娛清晝
石作鬼面皴
樹比佛脾瘦
天橫尋丈碧
幽幽坐雲構
摩挲辨題名
苔蝕半脫漏

水樂洞

徑折穿羊腸，複洞空響接。清游宛前事，七稔等交睫。裂石出怪杉，黏竹見寒蝶。乞此流水聲，洗我雙荷葉。

理安寺

老禪伏虎處，遺跡在澗西。巖翠多冷光，竹禽無驚啼。僧樓滿落葉，幽思窮扳躋。穿林日墮規，泉咽風淒淒。

蕭山

喚艇晚來急，天陰雲欲凝。樹紅迎北幹，江白隔西興。賣橘山家賤，歌菱越女能。東游興不淺，篷雨響疎燈。北幹山名

山陰舟中四首

寒雨欺晴曉，未歇故添溼。翠到船窗西，風併作銷魂思。

新雁一聲飛渡江

白塔湖邊孤櫂開，風回忽卷亂雲堆。越山絕似西施髻，

朵朵翠翹浮水來。

幽泉細細葉蕭蕭，白石清沙舊板橋。最好晚山堪畫處，

一帆風裏送歸樵。

鏡水稽山照眼清，吳兒未肯寡詩情。愛閑欲向天公乞，

采若籠鵝足一生。

夏蓋湖

幾曲蘆漪外，如梭艇子過。駕風波忽大到，海地無多茫。昧思前古悲涼發，慕歌事見晉書夏統傳寒更何處泊。髣髴聽鳴

鼉。

義石謠并序

慈谿縣長溪嶺下有石翁仲明故宦某墓上物也後嗣
衰落將鬻於他姓夜夢翁仲告曰吾事君先人久義不
可去明日集眾牽挽之重不可移強舁至數武遂折焉
鄉人奇其事為亭覆之顏曰義石予過而作是謠
武擔有石鏡祇照妖魄啼昭陵有石馬但解中宵嘶長
溪嶺下松楸地石人將移窆隕墜無數青螢照漆燈憶
君長是垂鉛淚溪風颯颯石人語吁嗟得新毋捐故

展先大父墓感賦

吾祖墳頭柏先親昔淚斑生遲違撫抱僑籍隔家山遺
德耕糴內棲神恬漠閒酸辛纔一到酬草想音顏

鶯脰湖

帆影挽不畱依依掠沙渚豁然晚湖開平遠迷處所病
柳隱漁屋孤烟識炊黍單舸若汎鳧得魚網自舉嗟予
紛塵營衝寒久延竝同在一水閒寸心肯相許西風不
見待吹斷蘆中語

姑蘇旅舍夜雨

他鄉今夕雨漂泊暫停橈不滴無愁地偏聞少睡宵風
傳街柝冷雲溼寺鐘遙多謝殘燈火畱人烏鵲橋

欲游滄浪亭因雨不果悵然有作

喧闐海涌峯岑寂姑蘇臺仰止濯纓人兩度仍空來水
竹不寓目吳船還獨開想見破窗下雨點寒莓苔

野蔓盤
青入破

窗蘇子
美句也

新豐

百里丹陽路炊烟聚一區有霜侵旅鬢計日改川塗水
落塘猶在天寒酒可酤詩人例辛苦蹤跡滿江湖

陵內史立曲阿新豐塘既田八百頃初洪為頌陸放
翁入蜀記云太白詩南國新豐酒即指丹陽之新豐

廣陵寓樓雪中感懷

北風凜削肌柳花溼而墜小樓更添寂薄酒不成醉入
夜短燭孤羸僮已先睡何人煥寒譙隔院喧鼓吹沈酒
居者心浩蕩游子意平生澹泊懷榮利非所嗜西笑詎
云樂明發難自棄茲來捫空囊翻為故交累謂程因思
在家貧襁褓尚高致束書細遮眼疎花香破鼻紙閣無

多寬迴隔飛塵至因之問故園南鴻煩寄字

寶應舟中月夜

蘆根渺渺望無涯雁落圓沙幾點排明月墮烟霜著水
行人今夜宿清淮

渡河

北來始作汎槎游晚色蒼蒼望裏收一綫黃流奔禹甸
兩涯殘雪接徐州古今沈璧知無限天地浮萍各有謀
明日輕裝又驢背風前慙媿白沙鷗

驟車口號

輾轉雙輪盡日顛黃塵一隊逐蘆鞭柳絲未吐梅將萼
夢到西湖罨畫船

宿遷

漸遠江南地難禁朔氣威檣烏河上集塞雁驛邊飛冰
勁妨行轍塵輕襲客衣明燈投野店草草亦如歸

郟城

下邑古郟子寒朝脂我車亭猶傾蓋舊俗是問官餘烟
舍凝微雪風餐毛凍蔬飢時聊慰藉行役意何如

過沂水

征轅指沂水驚沙落如雨禹貢諸大川北來數凡五
震澤江淮
河靈源自艾山其父始敷土遠會陪尾流東向滄溟吐
窮冬方凝冰文漪靜不舞居人鑿用汲色瑩白如乳匪
云川無梁橫板劣接武懸車藉眾舁索錢難屢取喧逐

久乃過偏側良亦苦何時輿梁成神明載縣譜從此隔
岸山快展兩眉嫵

半城

雪消半露翠屏顏縈盡征塗犖确畫看最佳行最險
將車初上大弁山

弁作平聲

蒙陰

衝風苦愛帽簷斜歷尾無多感歲華卻向東蒙看霽雪
青天亂插玉蓮花

羊流店拜羊太傅祠

茅屋疎林雜晚炊羊公祠下獨來遲探環已失前生樹
墮淚猶存故里碑盛德在人如昨日清淡誤世詎同時

雍容裘帶瞻遺像深媿無才進些辭

泰安道中望嶽作歌

平生五嶽願未從真形突兀蟠心曾東游齊魯首瞻岱
百里遠見嵐光濃半天明滅千芙蓉羣山如水皆朝宗
盤車五汶豁雙日元氣迴薄開春容青帝所宅神秀鍾
富媪孕碧攢諸峯位當出震德在木天喬萬狀敷葱龍
尊如端冕秉璧琮嚴如闕戟羽葆重陰陽闔闢百靈集
魚雅想見乘蒼龍荒荒輦路人不逢一枝安得扶瘦筇
堆梨散棗無覓處白雲猶護秦時松維神惠澤霑三農
只今苦旱方窮冬獻歲二麥望成熟玉戲快雪除灾凶
時山東雪未霑足我來欲訪安期蹤八溟海外洪濤春天之五嶽

有東嶽矯首遥眄心怔忡征途鞭影何怱怱孤烟一抹

歸鳥衝不知氣象爾何物但聽木末敲疎鐘謝道韞泰山詩氣象爾何物遂

令我屢遷

晚次齊河

白日沒長林風埃滿客襟山趨野寺斷烟入戍樓深飲
水防齊瘦懷鄉類越吟憩裝寒更緊釀雪未成陰

除夕宿德州

客裏休尋餞歲筵河干聊爾息吟鞭荒村已是裁春帖
茅店猶聞索酒錢燭為畱人遲見跋雞防失旦故爭先
郎當遠鐸仍催起回首東風又一年

河閒懷古以下辛丑

瀛海盤迴地勢雄古情客思共無窮錢工數處囊偏澀
鉤欲藏時酒易空三日開年歌吹寂一城飛轍往來通
獨憐大雅今銷歇誰向苔花問故宮

都下春雪懷里中諸友

春來旅思極膏騰枯坐窗閒類凍蠅撲絮乍逢燕市雪
搖風不見米家燈地爐勤撥聊添火硯滴難融可奈冰
爲問孤山梅息耗幾人游舫得閑凭

南歸次琉璃河

一昔都亭路歸裝只似初恥爲主父謁休上退之書柳
拂差池燕河驚撥刺魚不須悲楚玉息影憶吾廬

苦水鋪

苦水名初識何年續水經高榆齊剝白時山東苦饑細草遠連
青牆上驅雞過溪邊飲馬停勞人歌一曲顛顛有誰聽

任城夜雨

城上陰雲覆酒樓城邊行客苦車休鄉心已逐殘春雨
一夜平添汶泗流

東臯閑居

白袷成新隱青苔徧舊蹊水明村裏外樹罨屋東西菜
把官羊敵茶香佛粥齊慨馬思靜侶安得手同攜
李森劫鉢圖吳耕民索賦
般羅迦婦色最姝噉食人子充飢劬彼鬼亦復愛其子
賓伽雙髻玉雪膚山雲爲衣女蘿帶撫摩不忍離須臾

佛以慧眼照惡趣知具佛性無差殊定力攝入水精鉢
宛轉求出啼呱呱爾時鬼噴逞餘技鳴笳連鼓相嘯呼
兩甄八陣聚什伍頭角巖業雄牙須拔河絙麤挽萬石
雲車風馬來張弧擲刀作雨滿空際吐氣爲火緣都盧
豈知是鉢屹不動縱有藕孔難亡逋母慈淚等大海水
五體投地稱南膜琉璃喉出微妙諦汝噉人子無時無
汝子五百盛種類云何結念徒區區羯肌王女過去是
不持戒故淪兇愚能於我法修淨業還汝大寶光明珠
母喜禮足向調御本無有鉢攜其雛畫師何者善狡獪
細意渲染爲之圖人言可憎定不妄說鬼聊爾相歡娛
書生亦有弘誓願願勿瀕海生虎是日間臺 灣有寇警

五月晦日作

孤行但寂寂流光恒冉冉豈乏奔競途廁足畏嘲貶屋
餘古人書高逸跡可檢食力慕徐穉通隱羨何黠苦無
上水田二者附亦忝歸來倏初暑荆扉白日掩耽此綠
陰閑養性惟以儉林風吹葛衣池影翻釣簞少馬西山
雲屋角生有滄翼翼雨氣來沈沈夕陽斂向夜默無言
草際孤螢閃

夏至前一日同少穆耕民汎湖

雨後看山綠繞城鏡初卷半湖明荷邊魚在香中戲
橋上人從畫裏行料理酒杯無俗物銷除席帽足閑情
水風忽送涼如許搖曳新禪一兩聲

西湖竹枝詞三首

楊柳作花湖水香湖上樓高不見郎西山惱殺冷泉冷
南山愛殺長橋長

新隄桃李能白紅畫船來往只湖中郎怕傷春復傷別
儂怕愁水又愁風

儂住西村暮又朝搢盡畫帚金綫條女兒山頭新月上
照儂自掃雙眉嬌

畫卧

安心澡雪盡教空長日關門一枕中跂脚飛塵難我涖
支頤清夢許誰同黑鶯燕子翻塔影涼受槐花灑地風
慙媿夕陽如有意醒來每到小窗東

題文五峯蘭亭圖

江東禊事晉羣賢內史風流老筆傳水色曲如蘭上里
山光青似永和年一亭雲日供觴詠四面松篁替管絃
展卷好畱陳迹在莫隨醉本散飛烟

七月十七夜對月時將之婺州

繩河斜影落風林獨掩柴關露氣深好月不嫌遲照坐
已涼何恨早攤衾事過唐肆空求馬跡類寒枝未穩禽
爲報東陽山水道安排烟翠待清吟

湖上秋陰同陳楞山符幼魯施竹田張東扶作
秋氣在蘭枋澹然諧素心蕭雲翳空水滅景墮遙岑欲
寫尤難狀將畱不可任絕憐歸渡晚疎蓼一叢深

晚發江干

落日挂帆去背人飛鸛鵝風烟秋半淨江水晚來波漁浦山爭出樟亭樹忽過尋源意飄蕩一聽越鄉歌

富春

富春縣前江勢奔危樓如畫俯山根林林人影向沙市葉葉風帆下海門秋入遙空無寸翳旱經焦土有千村田家正墮憂時淚安得新醅倒瓦盆

江行曉望

膠角遠村雞江行俄已旦推篷貪清景涼露半天散遠洲信透迤盡處如玦斷連山聳蒼翠綠流競秀粲水際烟輕明忽抹山之半徐引青楓端漫靡不知岸阿那幾

幅帆日華相凌亂漁商互通語來去乘汎瀾微微遞遙鐘隱隱見樾館悟此趨向歧層波媚獨翫

夜泊桐廬

弭楫桐君山欲謁桐君祠桐君不可見月黑山參差是時秋江明遠近生寒漪村深犬吠客夜靜鵲繞枝卧聽戍角聲悲雜松風吹作客山水鄉塵土何由緇

七里瀨釣臺下作

山入巖灘合沓遮灘聲盡日走雲沙禽魚不解畱行客鄉里唯聞重釣家嫋嫋涼風帆影轉層層僧舍竹光斜補脣晞髮詩魂在按徧枯腸自煮茶

石塘洪阻淺

甘雨一旬愷秋水落涯涘舟喧積石橫月在行客起寒
裳涉微流寒碧亦可喜寄謝嵩高人毋憂傷玉趾

望金華山出雲俄而大雨

齋心訪名山駕言入金華金華迢迢不可到但見翻風
撼石樹色何槎枒籃輿徑穿城外去一桁遙青亂鋪絮
森然三十六洞天正在白雲離合處忽如饋餽炊乍濃
又訝奔馬來何峯其間盆涌墨翻汁俄頃變化隨飛龍
不辨山巔沒山腹山與雲旋溼淋漓冰壺洞中水簾倒
卷珠琲垂散作秋霖落雲族雲中髣髴霓旌神仙得
者皇初平石羊叱作雨工起奮髯抵角跪且鳴噴灑林
壑天瓢傾山邪雲邪兩奇絕衣溼松明還可熱何當聽

雨鹿田寺暗瀑吹窗燈暈結但願打鐘埽地老此山結
屋青崖坐看雲生滅

自金華至永康道中作

筍輿懸度翠嶙峋連日看山態轉新礪仄泉疑翻白鷺
雨深松欲化青人秋衾夢落前龕磬晚飯詩題破壁塵
不是平生多遠意寂寥無侶恐傷神

永康懷古四首

方技用前民利在不詭俗趙侯善越方祕怪駭羣矚梧
鼎爨屋茅張蓋坐溪綠徒嬰賢令法逸翮謝高躅吾欲
毀其祠勿奏神絃曲

事見後漢書方技傳

穹龜大如笠不隨風雨飛有人入山去徒步擔之歸纜

船夜著岸老桑灼禍機以諗諸葛恪物類感甚微析薪使其爛同盡知誰非弘覽既靡漏保身宜不違如何石

事見吳均續齊諧記

子岡蘆葦為單衣

天寶觀前松峨峨三千年一旦化為石礪節目堅匹

事見沈汾續仙傳

如託劍解識者唯神仙賞此松石意安得凌紫烟

雲巖高參雲巉絕無與偶奇哉壑藏舟不可負之走舟

張治

尾如蠶垂巨釘墜誰取野僧洗鐵花遂落孟兼手

為剗犀刀佩以期不朽奈何非其人異物或為咎神鋒

事見徐尊生懷歸稟

將返武林畱別張梁友先生

十日琴堂任天涼抱病歸偶游岵索米臨別感傳衣社

鼓聞茅店谿春隔竹屏心期還不負久薄世輕肥門菜

九日同東扶游棲霞嶺諸蘭若六首

淨業菴

城中厭喧卑尋山事幽屏旁舍啟樹陰葉下秋更靜刹

那悟塵緣香寒對僧影

白蓮菴

安禪最高巔南峯俯突兀蕭條白芙蓉池荒香不發微

諦亦已忘疎磬散清樾

法螺菴

同游皆淨侶契此林下居翳翳半峯影空院生寒初迷

方未云指塵跡遂來疎

帆菴

石路轉蒙龍何處尋
梵放帆菴始知名
高閣時可望竹
風起夕陰蕭瑟難具狀

近溪菴

隔溪已延佇
人門山幽幽
暗泉不聞響
窈然林壑秋
何時支公中
餅復茲游

嬾雲窩

殘陽在檐間
空翠落如雨
道人摧貢高
畱客嘗法乳
向夜依禪關
唯有雲幾縷

東園

鹿眼籬邊豆葉零
機絲一半掩荒局
舊游慣識東門菜

秋露秋風十里青

宋時東門絕無民居彌望皆菜圃故土人有東門菜之諺見周必大二老堂雜志至今俗猶然也

晚秋齋居

一夜霜風撼竹門
年年秋事在
正樊貧憐
圓菊仍分豔
靜覺涼葢自減
喧干世策堪
黃口笑背時
詩待素心論
中年不負蕭閑味
落葉池邊釣石溫

試天目茶歌同蔣丈雪樵徐丈紫山作

陸鴻漸作陶偶人
茶事往往傳
失真四十三
種列高下
天目品與舒州鄰
東西頂池湛
雙鏡奇峯秀
崿排青旻
許邁宮連道陵宅
靈根迸石無
纖塵含滋雲
霧灌泉脈
抽芽一一畱餘
春山僧采焙
趁穀雨紙囊
箬裹封題新
肉食貴人未知
重例取武夷
羅芥空紛綸
雪樵子心似

天目山頭兩泓水獨識茗柯有至理市隱近在吳山坊
坐我三腳之木牀空庭晝靜啼寒蠶爲我手淪魚眼湯
須臾越盃發妙香微參鼻觀風悠颺名山秀液入肺腸
恍然置身天目頂青神鳳集樹下同相羊李德裕平泉草木記
木之奇者天目之青
雪樵子邀我與徐丈同作試茶之長歌兩篇傳示句
清語硬肩相摩我無筆力奈爾何天目茶可拍天目筍
可挑安得茶筍佳時一赴山靈招勿使塵中立望空迢
迢

臘月二十四日探梅孤山題壁

屈曲紅闌繞幾巡冷雲先作一分春梅花半樹倒臨水
便與逋仙寫小身

人日雪以下壬寅

巧將薄雪破春妍便有幽禽到酒邊料峭餘寒作人日
寂寥情味逼中年梅花何處已堪折柳絮無端早放顛
惡客不來塵事絕蒙頭乞我醉時眠

耕民齋中看梅

幾樹疑在水參差簾影空苔皴微冒雪花側半吹風閑
思燈初落春懷酒正中妙香須管領況復與君同

題亦諳上人黃山圖

憶昔觀此圖南屏倚高閣松雲蕩心魂有句不能作冉
冉七陽秋南北縛雙屨去年東阿城逢師瘦於鶴如聞
化人心積蘇故可託停車通一語游戲除六鑿我歸師

亦歸昨夢風掃籜塵纏最慙媿咫尺跡如削入春獨掩
關窗疏遲景落此圖忽寄示通句云當索舊觀已復還
慰眼暫爲樂似證飛行仙層層度林壑唯聞木蓮花香
氣滿寥廓真幻兩無住黃山被師攫借師畫中禪聊爾
資嗚噓

清明日宗陽宮浴

昨雨今已霽朝旭開人眉不知此何日簷柳青垂枝徐
步叩藥宮消搖忘所爲道人憫塵垢俾我洒濯之宛頸
上善水道家沐浴七益一者上善水出雲笈七籤如鳧拍漣漪宿滯散百脈餘潤融
三池起詠內景經勝食齋房芝風篁拂苔石肅肅靈簫
吹被髮游物初老子吾其師

游龍井

惠遠住虎溪辨才住龍井坡老獨見訪送過風篁嶺亦
如虎溪邊三笑趣自永遂令龍井名遠與虎溪併惜哉
過溪亭跡滅蒼烟冷而我果斯游多年願力猛穿村拂
女桑度磴落山杏何時毗嵐風吹墮石雲影片雲石已作安得
巨靈手重扶使之整寺門萬竹中脩脩翳光景幽雲擁
殿角諸佛同一靜僧樸狀野鹿問事不復省導我窺井
闌淺可勿用綆傳聞金鰻鱷或見游藻荇豈其青泥蟠
時出應祈請前年秋大雨水立勢欲騁神物終斂形取
足供瓢瘦是日僧所述如此摩挲秦郎碑陳義臻奧境泉德類有
道片語默已領酌泉爲襄回殘陽閃鴉頸羨彼樵牧流

終身事幽屏

題金繪白江聲草堂圖時將入都

江聲主人江上住范村西去緣江路草堂髣髴木香村
竹嶼依稀鐵爐步門前江色晴黏天屋角嵐霏晝搖樹
柳絮著水魚正肥花片入簾燕新乳主人急裝將遠游
風光似此盍少畱塵中知己苦寂寂鄒生枚安徒沈浮
為言頻年役衣食人生識字甯無憂有田十雙我將老
息壤在彼盟諸鷗華君秋墨戲今倪瓚下筆烟雲互凌
亂歸來舊徑在眼中隔浦低橋青不斷貧無送子雙玉
餅展畫吟詩反覆看他時相約力著書釣石猶堪置柔
翰

城東落花

富景園中萬樹斜深紅縈草淺縈沙今年病酒無人事
纔得工夫送落花

懷徐丈紫山客金陵二首

中秋過後重陽未澄碧天光裂葉風濁酒一杯歌一曲
久無此興欠徐公

春分彈指又秋分記寫新詞篤耨熏今日秦淮歌板絕

僧樓應夢馬湘君今年春分同紫山賦倚羅香一闋

和蔣丈靜山九月八日登吳山

聞道城南載酒游清江如畫遠峯稠不愁紅葉明朝雨
先借黃花一日秋老去情懷無檢束興來風物即淹畱

登高難得鮮新句搔首真慙趙倚樓

題吳丈志上小像

我識石倉突長身比鶴癯青衫舊名士白髮老潛夫城
市看花入溪山載筆俱襄陽習鑿齒著述近來無

吳丈近
葺武林

耆舊集按討
最為該洽

東臯晚秋

東臯土閑曠薄暮行蹤絕因思古隱者於焉衡宇結

元末
范思

賢居錢唐城東地平衍有草木禽魚之樂賦詩
鼓琴為娛自號東臯隱者見徐一夔始豐類稿近市既無求浩歌氣彌

烈令我懷斯人魚鳥轉親切脩脩林水閒遺躅猶未滅

得風枯條鳴將霜遠天潔悵矣不同時誰慰授衣節

樊榭山房集卷二

樊榭山房集卷三

錢唐 厲鶚 太鴻

詩丙

相國寺訪亦諳上人

以下癸卯

吾師諸行苦白足辭南屏洗盃入城市破寺風泠泠昏

旦塵一聚不見芙蓉青閉戶即正壑自性非殊形許由

未聞道棄瓢徒內熒耳非駐聲器無耳甯無聽晚樹下

落日龕燈冷於螢孤情出秀句勿事重翻經

春雨夜坐

春懷憺無豫多雨境亦適平生遠游心中歲但荒寂卧

聞簷閒溜時作幽泉滴影事詎可追新愁何用覓正復

念梅花高樓一聲笛

雨中同符幼魯聖幾汎舟河渚看梅暮至西溪
春山始可游逢雨成奇矚亂水添魚梁奔雲出幽谷低
逢何所詣蕩漾轉深曲回瞻雲峯遠前與花林逐寒姿
媚荒筠一一事膏沐因依遠人境搖動淪漪綠客有解
清琴雨深音斷續暝色入孤絃風燈溼茅屋去舟尚躊
躇花光看不足

宿永興寺德公山樓

昏黑山雨歇一徑松烟蒙微聞梅花氣吹落疎磬中詎
惜衣履溼宿處投支公凭樓答人語迴與雲際同少選
沈靄斂俯聽幽林風明星忽三五挂在殿角東短燭照

春綠夜靜山逾空觀河悟眾象拂石期冥鴻神清了無
夢亂壑流何窮焚香以達曙茲焉悅微躬

同作

錢唐符 曾幼魯

空山行晚雲褐衣溼春雨昏際人漸希杳靄入深路
曲礪伏潛流叢篠紛交護到寺僧相迎把火話曩素
雨止鐘亦殘星光出幽樹境異心頓開魂清跡偕赴
夜窗覓山影影忽落如霧亂耳百松聲鏘然奏韶濩
清極本無寐有夢亦同起至曉重儻徊烟華想流注
永興寺二雪堂曉起看綠萼梅是馮具區先生
手種

幽人先鳥起林礪正寂然是時春空霽山翠爭便娟的

本朝山房集卷三十一
二
的花開雨澹澹花上烟烟雨爲合離花態亦變遷祭酒
昔游此手種猶生前傲兀根倚石敲倒枝映泉微馨委
陳迹高格同枯禪儒官罷亦得不廢招隱篇攀花久延
佇世已無其賢

溪上巢泉上作

翫溪遂窮源東峯屢向背朝日上我衣春泉淨可愛不
知泉落處潺潺竹籬內喧聞兩疊瀉靜見一潭匯松風
颺纖碧花影蓄深黛名言猶有相幻照乃無悔悠然巢
居心頗欲終年對

秋雪菴

菴在水中四面皆蘆深
秋花時彌望如雪故名

夙知秋雪佳契闊三歲周今來際春初還有秋雪不曲

港迷進艇花源信回流稍深天影展四顧雲水幽弱攏
未拆土髡柳空依洲息心歸淨域彈指開香樓所得殊
寂寂無營諒悠悠此日樂莫樂觀生侶輕儵

柏家園行三四里皆竹樹梅花中

遵塗抱町畦綠林窺嶠嶠古屋氣始暄閑園地常潔梅
竹素所饒衣食理未缺旣得長子孫還以資妍悅叢叢
綠雲外斜陽照花雪烟影望自深風香渺難說行吟覲
歸禽安居務新節暫游如久棲悵與清景別

晚入石人塢還永興寺

撥蘿尋微徑山意黯將暮幽討忘體疲窈窕入深塢激
瀨不通人踏石凡屢渡返景忽難畱蒼蒼目爭赴萬竹

皆爲風千花并成霧去鳥有遺音歸樵詎同趣夕梵懷
信宿春溪延緩步入門不生月仍倚簷際樹

春日汎舟北郭

出郭逢初霽篷窗任意凭氣新如有獲興到亦無朋遠
水浮春寺青山落晚暈爲憐桃李色歸待月東升

春寒

漫脫春衣浣酒紅江南三月最多風梨花雪後醅醱雪
人在重簾淺夢中

綠陰

幽人與時鳥共喜綠陰成一徑千林暗斜陽片雨晴臨
池想康樂繞屋咏淵明卽此忘春去悠然悟達生

雨後坐孤山

林巒幽處好亭臺上下天光雨洗開小艇淨分山影去
生衣涼約樹聲來能耽清景須知足若逐浮名媿不才
誰見石闌頻徙倚斜陽滿地照青苔

夏日閑居

畏景何堪出風前卧簟斜樹陰連別徑草色入隣家舊
業閑來廢禪心病後賒今年飢似朔不擬上公車

湖心亭大風快涼得絕句二首

西北雲多失柳陰快風特地掃煩襟不成飛雨闌干外
涼殺沙邊兩睡禽

湖上青山深幾重紛然幽綠舞長松何人爲喚昭華手

橫笛吹驚水底龍

清平山精舍納涼

崖上緣修竹城南界小天幾人來亦偶六月興尤偏江
遠平看鳥窗虛俯聽蟬清風惜不得借與客堂眠

七月六日立秋送陳授衣之廣陵

作客畏逢秋君今詎不愁五湖飛一葉七夕在孤舟殘
暑過江少涼螢逐暝流歐公堂外柳為訊舊同游

金以甯齋中觀蘇漢臣婦象圖

西域乘象利戰攻南越貢象趨華風趙家山河已幅裂
欲圖王會誰能同當年明禋教車象象院驅來列成兩

吳白牧夢梁錄明禋年教習車象車後大象二頭觀者如堵

開封蘇郎設色殊寫出突過閭令

上貝多樹底風泠泠蠻奴馭象唯使令黏香似是孔雀
帚瀉水但用頻伽餅高僧侍者狀奇詭作禮蕃王喻微
旨蹴踏能將大力馴掃除不使纖塵累西域之象南越
無六牙四足蓮花敷畫院良工具深意調服強敵如斯
夫君家此圖傳自昔仍在錢唐睹奇跡裁詩復共小低
頭香斷空齋山月白

中秋對月懷都下故人

玉宇無窮望眼寬不辭清露溼杯盤秋來南國宜高卧
月傍東城得早看豆葉響回三徑靜桂花風入二毛寒
誰招遮日長安手直到天明共倚闌

秋夜聽潮歌寄吳尺鳧

送射山房集卷三

五

城東夜月懸羣木洶洶濤聲欲崩屋披衣起坐心茫然
秋來此聲年復年壯心一和小海唱二毛不覺盈吾顛
留中雲夢吞八九要挽天河斟北斗倏忽晴空風雨來
杳冥水府神靈走時哉會見滄溟立自是乾坤有呼吸
軒轅張樂萬耳聳洞庭天遠魚龍泣須臾聲從靜裏消
一蜚獨語星蕭蕭天明作歌寄吳子想子中宵亦聽潮
張東扶移居瑞石山麓
昔君買宅時城西數相見藥闌碧透池書窗淨于練意
復厭喧卑擇隣猶未善栗果多博徒出入須障面愛此
城南山翠逐深巷轉張南與周北戶戶事筆硯高楓紅
一林奇石青數片畱雲罷香爐賓月橫琴薦語我色忻

忻邀我意眷眷我賃東臯居有若營壘燕差得水三分
無山讓君先里鮮可語人閉門俗自遣過存近亦稀頗
不費茶串連牆恨未能來往共歲晏

初寒著敝羊裘戲作

一領龙茸歷十霜西風重見出空箱忍寒貰酒無多直
穿袖吟詩定幾章敗絮何慙擁王霸險衣今笑裏周郎
漸看不隱山肩瘦萬丈虛言蓋洛陽

冬日同東扶游鳳凰山

故宮何足問佛宇亦摧殘木以塵緣幻來將道眼看江
山迎小雪竹樹逼清寒雙雀尋苔啄飛飛下井闌

楊貞女詩

楊氏有貞女窈窕年初笄英英司馬孫喬木無卑枝明
心兼秀質說禮復敦詩行媒得快婿許嫁亦不遲何郎
薊門死女聞涕漣而上堂告父母聽女前致詞女幼習
詩禮大義或少窺古稱未亡人鮮有不結褵若女而不
婦佗適無相訾此語眾苟同女心難自欺許身等珪璧
親命詎易移匹如婿貧落風諾無參差貧且不可背死
乃忍背之女心抱微尚奚取鄉國知當歸何郎家再拜
從此辭父母聞之泣咄咄事大奇汝有松柏心吾亦不
汝乖桂楫青絲絳相送於河麋吳閭三百里雲水天一
涯本意曲顧歸竟爲同穴期入門拜尊章毀容披素帷
身是女貞木淚作寡女絲死當化玉睢生當號長離

雨後寫望

風敲病葉入疎櫺雲破寒山數筆青十日鼓琴晴始出
夕陽依舊滿迴汀

贈韓丈自爲

金粟風流久絕羣弁陽今復見夫君梨花萬樹營生壙
自說他時葬白雲

嚴朗屋寫小像爲杜子春事索題四首

長安游戲倦風埃論到錢愚劇可哀脫手紫標三百萬
杜郎俠骨本仙才
雲臺峯頂約驂鸞杞犬芝童覓最難上界曾聞足官府
囊空不贖一錢看

丹砂成土髮成絲月下空封六一泥畢竟求仙因藥誤

被執飲酒是男兒

君如夷甫不言錢卻采虞初入簡編歸去但尋梅尉女
挑燈細話小游仙

閑居和丁敬身

徑有青蕪石有衣不嫌蕭瑟與心違隣燈明處先穿樹
山雨來時自打扉營室差能學劉峻養病多為擬王微
灾年杞菊收猶薄且辨辨晨興小忍飢

寄徐丈紫山嶺南

此別驚垂老初鴻有信傳勤收駐顏藥儉用賣文錢鄉
夢過梅嶺吟情寄竹田歸裝定何日日極浙江船漢書南越處篁

竹之中師古注篁竹田也

雨夜聞雁

燈花不向雨中開擁被愁聞雁叫哀深黑雲天箏柱落
昏黃庭院榜聲來誰家關塞書難寄到處江湖羽易摧
甚欲孤篷南浦宿殘蘆滴響夢驚回

哭王源村丁茜園二首

平生師友十年間雪月花時記往還原季長貧成白首
應劉俱逝託青山篋多遺藁從人取室少孤兒信命慳
北郭西橋同此恨笛中先後淚潺湲

賈生賦裏嘆浮休欲再為歡挽不畱練日人間誰會葬
傷春地下必相酬谷音寂寂雲無色神理緜緜水自流

兩地明年作寒食棠梨零落一般愁

金壽門過訪以詩卷索拙序茶話良久殊慰寒寂

爾我相看已壯夫恆河照影昔游徂江山興好朋尊隔羅綺年來一字無折腳鐺邊殘葉冷缺唇餅裏瘦梅孤只應絕調艱爲序卷卷淹畱類賈胡

餅菊和丁敬身

翦供寒花霜露餘琴牀筆格映森疎徑松荒後爲餅隱山杞持歸伴水居影畫銘心燈耿耿夢香養鼻蝶蘧蘧幽人服食宜清苦畱得風標一起予

懷亦諳上人游鄧尉

城中數覓不相遇阿師始是心出家寫經坐沈木漬雨負杖吟過銅坑花天寒正覺五湖遠歲去那用雙手遮窗前舊竹亦可念一兩三莖曲復斜

東扶送水仙花五本時臘月七日雨中

春思於花亦太廉一花一葉一愁添肉人不合尋常見燈影娟娟雨半簾

題沈欒城歌詩圖

戍削春衫瘦更妍故持樂句近君前玉溪比日風情減難擬清歌沈下賢

汪青渠營土橋精舍去予居二里許雪中過之不值題壁二首

近得林中侶堪爲雪裏行玉川雙破屋東郭兩先生積
素微封徑寒雲半入城白鷗吾與汝一笑眼俱明
竟日空亭坐遲君開板扉幽禽啄凍雪風竹發清機孤
趣忽自悅遠言相與違昔人翻興盡容易剡中歸
寒夜同沈樂城杭大宗集趙功千二林吟屋分
詠歲除節物二首

膠牙飴

節物關人意殘年一椽添蓼花分點綴粉繭共黏俗
嗜難頤解微甘使口籍不妨吾舌在蜜味得相兼

陸放翁詩新燥

餽杖綴
蓼花

枳盆

枳盆宋時亦呼生盆
見劉昌詩蘆浦筆記

屈指開爐後生盆卽漸催紅飛松葉火白壓豆蘗灰列
屋明通夕深廳聒一回兒童應未覺扶暖上簷梅

同樂城耕民游良山山在城東北高可二丈許
蓋土阜也旁列古松三四晚風肅然殘雪在地
卧殘碑已中斷讀之不甚了了乃元良山土神
廟碑大德己亥紹興路儒學錄古杭沈德章記
并書廟不知毀於何時作詩紀之

阜亭雪未消數峯粲可數城陰良其背有此山戴土牽
拂無事朋共探風物古晚寒閉漁村斜陽入蔬圃疎松
時一響似喜我輩撫徘徊去仍畱斷碑記祠宇惟存豬
兒年髣髴辨某甫斯人今安在閱世如過羽社翁一尊

酒寂寞罷歌舞明年梨花時再尋比韋杜沙河春水生
看客曳柔橈

歲除日同王雪子吳耕民放舟湖上入南山作
路入南屏葑草荒冷雲閑鷺兩相將岸痕倒樹生新水
塔影留人戀夕陽春八九分來鼎鼎年三十二去堂堂
青山似欲償詩債著意湖邊列雁行

白樂天詩何況纔
中年又過三十二

春來以下甲

忽忽燈期過春來只惘然花開貧酒戶草長舊情田小
檻拋書坐幽窗背月眠無人知此意語鳥漫相憐

題盛嘯厓樵秋圖

秋碧有聲霜紅有色山寒不欺徑仄不惑一耒而耕一

船而漁行吟負薪孰云非夫如困之石亦介其守予肩
則頽予顏則否籬延于菊門隱于莎曷歸乎來勞者遂
歌

溪上巢懷去年與幼魯同游

山行有常期卽事感今昨春候雜暄凄人心異所託獨
爲泉上吟坐聽鳥聲落鏡我塵土顏竹木影參錯我友
支許流往者共斯樂去矣渺川原懷哉悵猿鶴幾人京
華游能不廢止壑擬宿贊公房夢尋煮茶約

石佛菴贈敏上人

釋子吾宗秀新詩似白雲開門一花落繞屋百泉分定
老烟蘿色悲同魚鳥羣塵中漫回首清話幾時聞

元詩僧
白雲英

上人唐侍御
元之後也

沈大匡先生華山草堂

心跡竟沈淪空山闕古春亭留唐野史名在宋逋臣破
壁全題字雙松一作新惟應千載上媿殺痠腰人

西溪梅花已殘永興寺綠萼二株正盛開

春風十日怒於虎香雪紛紛落成土我來恨與花愆期
懶逐閑雲入花塢一笑逢此萼綠華冷寺空庭相媚嫵
林端初日開烟霏皜曜鮮妍世希睹花雖無言酬以意
為待幽人來作主幽人與世實寡營捷足纖兒每工侮
目成色授不嫌遲卻月臨風更須譜空香入磬韻微茫
枝格橫苔影交午為花不惜三日留隔竹一聲啼翠羽

二月十七日重游洞霄宮探大滌洞天

振衣浴罷體更輕竹杖投石聲彭觥空山昨夜龍洗窟
雨過萬壑泉縱橫山靈知我有默禱故遣松風作前導
一峯陰見一峯晴天柱中央翠於埽元同先生昔隱居
洞天長鎖琅函書前游日夕未曾到恨身不得乘飈車
穿盡幽篁履苔石驚見谿訝洞門坼童子曾為擣藥禽
桃花解笑題詩客此中日月停兩丸想像九夏尤清寒
微明秉炬觸暗壁古靈題字來尋看洞中題刻多漫滅但見一
處云陳襄述古來於已夏
玲瓏乳竇隔凡處路接華陽不歸去有人問我洞中來
為說浮雲如柳絮

功千見示劉松年溪山樓閣圖用坡公集中韻

淳熙小字藏石邊絹素微裂凝塵烟暗門劉郎呼欲出
鶴歸城郭應悽然劉郎自具擘山手斷續飛下雲中泉
重樓面勢各向背地非輞口非樊川蔽虧綠樹露小閣
水紋山影闌干前消搖白日不待遣倚枰二安全其天
尋詩一老獨有意目送去鳥窮幽妍尤工遠勢寫村落
背崦或有桑麻田丹青不讓李晞古金碧直壓趙大年
畫史筆力在盤礴無取小景爭便娟關門聽雨品字坐
焚香埽地曲尺眠落花將春作昨夢主人與客俱列仙
只愁青壁太斗絕畫裏欲學猿猿緣莫言此畫非我有
他日想見哦長篇

同張東扶石貞石游雲居寺禮中峯和尚髮塔

幽磴無人行露蘚綠相待倚山爲女牆春物見爽塏叢
深鳥嚶嚶沙崩石磊磊長廊據寺勝酌泉散憂痲恭聞
大導師岳畔藏落彩唐淨業法師塔銘高宗忌辰方階落彩作禮向閑房眞風故
常在選樹坐移陰仰看雲意改游雲忽東南遐心渺江
海

同作

上虞石 文貞石

春雨回荒姿餘寒晴復陰透迤步石徑禪室來幽尋
眾山已秀發綠淺未滿林繞寺雉堞壯入門臺殿森
阿師久西去遺履猶至今妙相渺難睹默契情更深
合十向雲際恍聞淨土吟四體豈無愛諸妄惟滅心
緬彼紺螺色香土歲月沈但餘烟草碧如絲緣塔侵

平生慕禪意苦爲飢火燭焉知此僻境修廊靜悄悄
閑閑湖上景悠悠南山岑鋤聲徧芳野微風忽鐘音
暫憩殊有會虛寂歸沖襟

題沈啟南冷泉亭圖次韻

石潤林香下夕暉風中似有磬聲微好山招隱貧難買
妙畫通靈久亦飛題字尙畱前輩在聽泉今見解人稀
頻年不踏松陰路卧以游之恰忘歸

有吾杭劉邦彥吳江汝其通并啟南自題詩

同作

錢唐沈嘉轍樂城

爲看詩畫攬清暉遐想當年結思微古木千章陰乍
合寒泉一道雪橫飛風流已往誰能續墨瀋猶香知

者稀曾憶晚來成醉後一亭烟靄見僧歸

又

錢唐吳焯尺鳧

晨坐高齋竟落暉祇因讀畫悟幽微聽來畢靜水生
響看到出神峯欲飛往事重題增感慨舊游如夢記
依稀回思翊屐經行處空惱耕烟閣筆歸

田居侍御會屬王石谷臨摹

同沈樂城吳尺鳧趙功千登六和塔

江行安徽風回泊龍山下羣峯勢蜿蜒茲塔獨凌跨何
年劫燒餘突兀八窗赭同游三數人綠陰愛僧夏層梯
入大幽初級見頗寡攬身盤空雲江色向我瀉三折之
字流隨山動平野東矚窮剡源西眺思汝社帆檣閱興
衰魚鳥被風雅萬古一斜陽欲玩不堪把塔中有金仙

詎是無情者

洗心亭看竹

遮簷萬玉翠森森迴合空潭倒影深若似此君何用洗
多生無垢亦無心

宿雲棲寺

入林人語忽尋烟來共堂頭此夜禪本色住山深有味
清詩呈佛豈無緣竹龍行水風回後栗鼠窺星月出前
不待諸天訶放逸心清坐聽曉鐘傳

次韻答石貞石雨中見懷

便作神仙亦號頑日長無客共蕭閑鬱洲家似邴根矩
退谷銘如元次山水鳥求魚衝葦外幽花綠竹出牆閒

城東若役高人夢帶雨籬門未上關

來詩有夢落城東水竹閒之句

梅雨經旬得遣懷絕句六首

小樓高處看雲奔銀竹千條挂晝昏不道去年池水竭
碎萍猶未浸籬根

欲出并無下澤車此生難得是三餘
夢絲不斷簷前瀑如在匡山讀故書

龍公一旬破怪多即漸空原展綠波十角吳牛三尺箠
棟花點點響烟蓑

久將脣舌薄君卿深掩柴荆罷送迎
穉竹高槐皆雨立忽然放出夕陽明

舊種垂楊綠埽磯北風將雨上漁扉前村半入空濛裏

雲帶炊烟溼不飛

手疎名士離騷酒眼避高僧競渡船一笑茅堂作重午
自鉏昌本煮清泉

立秋日同馬丈碧滄汪青渠松泉上人游惠山
舟中口占

綠楊深似雨港曲覆移舟停扇聽僧語西神山正秋

惠山聽松菴觀王孟端竹爐詩畫卷次吳文定

公韻

舍人雅尙寄名泉爲愛山僧手自煎餅響風中兼雨外
水評陸後更張前空寮只許茶人住一榻翻同竹祖眠
三百年來畱寶墨簫材無恙是天全

廣陵秋夜聞絡緯

清月出三更重露零百卉空堂風騷騷卧聽蟲恤緯不
能成我衣爾蟲焉足貴

題余葭白青燈雪屋圖

賤子客廣陵塵土感騷屑白帝初執矩赤燦未弭節何
方解炎歊噓以庾郎雪移我墮寒林短紙開凹凸銷餘
復待伴入夜氣嚴潔琤然落風枝夢醒覺衾鐵燈光與
雪光爭此破窗穴直身凜自持孤吟慘不輟琴絃爲一
心雖凍詎肯折起視江外山玉立正清絕寤言期斯人
歲晚祛內熱

公路浦卽目

傲傲水柳細成行荷葉無花亦自香行過江淮惡風浪
幽情忽到小池塘

桃源縣雨泊寄舍弟子山

帶雨河聲大維舟暮色虛蟲喧堤外草燭映枕邊書
瘵弟入魂夢衰親問起居天明仍捩柁遠道信來疎

嶧縣道中

蒼翠連鳧嶧秋原望更深僕夫通馬語行客抱山心
沙雨纔霑路涼蟾忽到襟豆花門巷小何處似家林

宿鄒縣謁孟子廟畢看嶧山夜月

廟貌樞衣拜機絲儼若新月來邾子國人宿孟家隣翠
嶧森侵漢殘碑遠失秦松風吹夜氣壁立四無塵

廟有斷機堂

富莊驛遇潦

野水秋無次能為塗轍妨棗林明四望黍壠白中央
馬足行雲影車輪陷鏡光空村烟火絕竟日苦飢腸

任丘道中寄汪祓江

雨挾雲陰天四垂孤城縈策況淒其綠楊風起狐狸淀
細草烟荒扁鵲祠劍客於今誰忼慨馬羣自昔重權奇
燕南趙北明朝是秋水茫茫有所思

趙北口

鬻盡長隄碧玉平喚船人集午相爭偶然束馬懸車渡
亦似浮家汎宅行魚柵低圍蘆作界酒帘斜挂柳為城
眼前便減風埃色何用臨流更濯纓

都下寓舍偶作

卽次便幽窄窗深雪紙明棘牆愁露索塵市畏風行自
攝安眠食無求少送迎瓦餅細菊小伴我一枝清
人洛誰相問深居等繫匏唐碑從寺勘秦譯借僧抄風
雨新圓夢雲山廣絕交時時期二妙攜手看烟郊謂金繪曰符幼魯
風氏園古松相傳金源時物近爲人所伐幼魯

有詩惜之邀余同作

昔游長安歲辛丑城南欲謁支離交雪雲連日成春陰
人事逡巡願終負鵠袍烏帽感秋氣首問支離無恙否
故人三歎爲我言長身摧折名不朽偃蓋爭看前輩句
清陰屢入游人酒不隨風雨飛夜半蒼鱗剝落根如白

我聞名與身孰親此理天壤誰爲剖藤纏敲壑雲霧障
長得千年養靈壽輪蹄人海空何心占此區區地盈畝
豈無匠石議斧斤竟使樵蘇疑怪醜榆承露盤不自畏
楮錄醫經最顏厚但讀南華齊物篇世間變化無不有

寄內

炎風記上郭門船回首高城更黯然徐淑初還因善病
龐公欲隱坐無田夢回竹月攤書地人道風潮損稼天
行卷賃居成左計心關桂玉路三千

南歸夜行趙北口同范希聲作

歸人千里指故鄉三更霜霧霑衣裳有如小兒卧車箱
搖則成夢醒已忘寒星在水森有芒仰視畢昴紛低昂

遠烟蒙密隄影長西風策策吹枯楊參差人語知異方
作事五角與六張我識此趣如瀟湘菰蒲明滅燈火光
驚起棲雁飛一行胡不飛去江湖旁

九月晦日曉行阜城道中大風雨午間飛雪宿
漫河作

野曠雲亂生天黑月正死登車偃破帽寒門開萬里風
從何方來洶洶鳴不已大聲東海濤小聲空林鬼浩蕩
達士胷自詫無此耳中間零雨集覓路復迷咫柅車倏
天曙兀兀行泥水天公善娛客吹作玉花委飢雀喧茅
檐勸我可以止溼薪燎故衣冰蠶鏗老齒江南孟冬天
妍暖梅弄藥誰遣北地游北地寒至此

東阿逆旅壁有無名氏絕句云霜樹微茫月半
環解鞍茅店且偷閑行人過盡巖更發一盞寒
燈滿屋山次韻一首

斷岫層巒似玦環客亭挂策夕陽閑重來柳髮疎於我
滿眼寒雲話故山

過東平懷蘇源明五太守讌集之詩城外山際
積水空明疑是小洞庭也卽效其體

夕稅駕兮宿東阿思東注兮若流波朝秣馬兮望東平
霜空晶兮初日生澹平林兮遠如一寒漲落兮洲激出
巡中湖兮眇而南山儻儻兮形眠蠶輕橈去兮思夫君
大藩理兮讌以文嗟繭絲兮人或擾懷風流兮散雲鳥

命元氣兮爲余舟野荒忽兮期同游

元氣爲期仲長統語

徐州舟行紀事

檣爲舟中權帆勢若懸纛有時牽挽勞竹索相綴屬我舟順流下彼舟適遭束絙急不可弛磨戛鳴數數兩舟掣而離其勢不轉矚篙師失聲呼疾似振空鵠高檣忽中折觀者膚盡粟我舟播蕩餘幸免鬼伯促性命亦匪輕造化戲何酷有如爭拔河一跌聊自贖又如放風鳶線斷偶然續神意憐迂疎字飽飯不足書寄破冢出事過虛船觸是時冬上旬冷月光於燭漕河下牖牢函水嚴監督三暮復三朝何時峽離蜀帽脰望南雲臨深古所昂

葺屋

倦游今亦厭飛揚始葺城隅破草堂檢校幽詩小經濟蹉跎寒事舊林塘晴天免縮參軍首雨夜休移杜老牀更乞山僧安隱法淨名圖畔自燒香

開湖寄徐丈紫山義興

君昔閉門湖上初葑雲萬丈復開疏誰其云者兩黃鵠我欲遺之雙鯉魚明鏡拭平西子面翠綃展盡水仙居待回罨畫溪邊權酒舫隨風縱所如

雪後同耕民汎舟北郭游一僧舍頗盡幽趣

臘尾能爲寂寞游恰經野渡有漁舟過橋溪水斜風急帶雪僧房落日幽世外話銷商陸火林中春在木縣裘

平臯鶴安今何處吟望寒山共點頭

元張仲舉在杭日有一私印文曰平臯鶴安蓋取北郭三

山名臨平臯亭黃鶴也見朱珪名蹟錄

春雪密香齋擁爐同少穆耕民作

春寒春雪劇相仍小坐林巒白幾層冷淡交情宜歲晚
清嚴況味在晨興同依品字柴頭火老作梅花樹下僧
門巷泥深君莫去紙窗猶有照書燈

樊榭山房集卷三

平野... 今何處... 時... 其... 韻... 山... 其... 韻... 山... 其... 韻...

春雪... 香齋... 燒... 同... 少... 移... 耕... 民... 作...

春寒... 春雪... 刺... 相... 仍... 小... 坐... 林... 窗... 白... 幾... 層... 冷... 淡... 交... 情... 宜... 歲... 晚...
清... 嚴... 況... 味... 在... 晨... 興... 同... 依... 品... 字... 柴... 頭... 火... 老... 作... 梅... 花... 樹... 下... 僧...
門... 巷... 泥... 深... 君... 莫... 去... 紙... 窗... 猶... 有... 照... 書... 燈...

樊榭山房集卷三

